

Spiritus animalis ex foro medico juste relegatus, sive vindiciae disquisitionum physiologico-pathologicarum, commentationi medicae ... Johannis Philippi Burggravii, Jun. ... oppositae / [Andreas Ottomar Goelicke].

Contributors

Goelicke, Andreas Ottomar, 1670 or 1671-1744.
Burggrave, Johann Philipp, 1673-1746.

Publication/Creation

Francofurti cis Viadrum : J.G. Conradi, 1728.

Persistent URL

<https://wellcomecollection.org/works/qc2kd5wr>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

61522/10 (P) 72995
SPIRITUS
ANIMALIS ^{et. 10.}
EX FORO MEDICO
JUSTE
RELEGATUS,
Sive
VINDICIAE

Disquisitionum Physiologico-Pathologicarum,
COMMENTATIONI MEDICAE

VIRI CLARISSIMI
JOHANNIS PHILIPPI BURGGRAVII, Jun.

Doctoris Medici Francofurti ad Moenum,

Qui
EUNDEM SPIRITUM NERVOsum
ab imputato crimine liberare & in forum Medicum reducere

FRUSTRA

conatus est,
oppositae ab

ANDREA OTTOMARO GOELICKE,
Medico, Professore ac Physico Provinciali Regio.

Francofurti cis Viadrum, apud JOHAN. GODOF. CONRADI. 1728.

61529/P





PRAEFATIO
AD
LECTOREM,

Verissimum CICERONIS dictum est: *Opinionum commenta delere diem, Naturae judicia confirmare.* Sic enim, observante PLINIO, per plurima consecutive secula actum est, ut altera Medicorum factio semper destruxerit alteram: Quia, cum *opinionum singularitate niterentur tantum*, non omnes, aliter fieri vix potuit, quam ut in unius destructae locum mox succederet alia, priori forte obscurior vel deterior vel à vero artis medicae usu alienior. Unde recte hoc sensu Hippocrates Libro de *decenti ornatu* inquit: *Opinabile sine actione, inscientia & nullius artis indicium est.* Eademq; adstipulatur Galenus hisce verbis: *Falsae opiniones, animos hominum praeoccupantes, non solum surdos, sed & coecos reddunt homines, ut videre nequeant, quae aliis conspicua apparent.* Quare neutquam persuaderi mihi patiar, *opinionum commenta HIPPOCRATI*, Viro tam gravi atque circa seria maxime occupato in mentem venisse, quando *Libro de arte ita loquitur: Invenire aliquid eorum, quae nondum inventa sunt, quod ipsum notum, quam occultum esse praestet; Scientiae votum & opus esse videtur*

videtur: Similiterq; & semiperfecta ad finem perducere & absolvere. Verborum vero in honestorum arte, ad ea, quae ab aliis inventa sunt, confundenda promptum esse, nihil quidem corrigendo: Eorum vero, qui aliquid sciunt, inventa apud ignaros calumniando; Non sane scientiae votum aut opus esse videtur, sed proditio magis naturae suae, aut ignorantia artis. Longe probabilius est, gravissimum virum sermocinari de inventione certarum quarundam machinarum sive organorum, quibus vel membra luxata melius restitui, vel partes, nativis suis sedibus elapsae reponi & in illis constantius retineri, vel utilia & scopis curativis certius, quam ulla alia, quae jam detecta sunt, satisfacientia remedia inveniri, uno verbo, rei Pharmaceuticae atque Chirurgicae rectius consuli queat. Quo eodem sensu jam pridem illa ipsa *Hippocratis Magni* verba mea feci, atq; disputationi, *de novo artificio curandi procidentiam uteri veram*, ante complures jam annos conscriptae ideo praemisi, ut, si quis forte in honestorum verborum arte apud ignaros calumniari auderet, & nihil interea corrigeret, *Hippocratis* auctoritatem ipsi opponere, atque, quid de talibus sentiat, eximio hoc loco edocere ipsum possem. An vero in rem praesentem, ubi de SPIRITUUM ANIMALIUM, sive, ut alii loqui amant, NERVOSORUM existentia & affectionibus disceptatur, quadrent, admodum ego dubitem; Quia, sive existant sive non existant, Reipublicae medicae parum vel nihil interest; Imo, si fatendum, quod res est, magis ejus interesse videtur, ut commentitium dogma è finibus artis profligetur; Quia non tantum inanes ac mere verbales controversiae in Scholis desuper motae cessabunt, sed & tyrones artis egregie sublevabuntur, ne, quod certo certius aliquando dediscendum est, cum taedio atque labore addiscere cogantur.

Salutarem hunc utilemque scopum praefixum mihi habui, quando ante hoc biennium sistema SPIRITUUM ANIMALIUM serio examini subjeci, visurus TANDEM, quid traditioni receptae Scholarum veri vel falsi subsit, postquam per integras consecutive secula caussam eorundem peroraverant docentes. Cum autem serio hoc scrutinio nihil occurreret menti, quod vel nuda

nuda tantum probabilitate vel quadam verisimilitudinis specie
fese commendaret: Putabam, rei medicae rectius consuli non
posse, quam si fabulosum dogma ex FORO MEDICO penitus
proscriberetur. Verum hoc ipsum est, imo suspicor, titulum
opusculo praefixum in primis fuisse, qui hypotheseos hujus fau-
tores quam maxime offendisse videtur. Nec inficias ibo, modum
scriptionis ipsis forte displicuisse, dum Processu quasi Inquisitorio,
SPIRITIBUS hisce intentato, illi, ceu criminis rei condemnati,
atque APOLLINIS, ceu summi artis Medicae PRAESIDIS jussu
RELEGATI sunt, & quidem ea sub comminatione, ut, si in di-
tiones medicorum reverti auderent, graviori poena certo certius
adfiendi forent. Bilem hoc ipso me movisse, non sinunt me du-
bitare conatus illorum, qui scriptis publicis bellum quasi mihi in-
dixerunt. Quidam illorum, uti paucos ante dies ex Disputatione
quadam Wittebergensi de Theoria morborum universali hoc anno ha-
bita animadverti, PSEUDO - APOLLINIS odioso titulo ideo me
perstringit, quod, nescio qua auctoritate ascititia succum nervorum ex
arte salutari prescribere non dubitaverim. Occupatus scil. est praedictae
Disputationis Auctor (§. VI.) in censenda modernorum quorun-
dam medicorum opinione, qui, ut ipse illis imputare non eru-
bescit, omnes morbos ex ANIMA, puta RATIONALI ejusdemque
actionibus depravatis proficiisci arbitrantur, qui que proinde ipsam DO-
MINAM, REGINAM ac IMPERATRICEM corporis constituunt,
nec non vitam, motum, sensum, alacritatem, & reliqua in vivente homine
apparentia & in oculos intuentium incurrentia egregia Phaenomena eidem
communicant, illudque à putredine, cui maximopere sit obnoxium, defen-
dere & præservare ajunt. Argumenta vero, quibus utitur ad sen-
tentiam hanc destruendam, uti millies jam ab aliis prolata; Ita
millies etiam ad illa responsum est: Ut propemodum, patientia
toties laesa & quasi lassata, aures hodie obturentur, ne inutilium
verborum strepitum audire amplius cogantur. Hujus farinae
argumentum est: Quod, licet negari facile nequeat, animam ho-
minis magnum omnino babere imperium in corpus, quantum scil. ad sen-
sum & motum attinet; Non pari tamen facilitate motus vitales

humorum corundemque secretiones & elaborationes adscribere illi possemus, utpote quos nesciente, imo saepius renitente anima, nihilosecius fieri & contingere, quotidiana loqueretur experientia. Verum cum objectio-
nis hujus insufficientiam ad evertendam ἐνεργειαν principii istius agentis Universalis, quam exerit in corpus suum organicum sua in Sciamachia ante complures jam annos clare ac solide ostendit Excell. STAHLIUS, eo securius prolixiori ejusdem con-
futatione potero supersedere, quo magis Praefationis leges jubent, ut arctiores intra cancellos me contineam. Altera Au-
toris objectio non uno opus habere videtur HERCULE, ut nodus iste Gordius solvatur. Consistit vero illa in eo: Quod, si succum nerveum ab hoc negotio, nempe actuum tam animalium quam vitalium in corpore organico administratione, excludere vellamus, procul dubio indicare deberemus, quem in finem cerebri & totius systematis nervorum machina in capite reposita, & per totum corpus omniaque ejusdem viscera sese extendens, adeo mirifice, affabre, concinne ac eleganter a summo hominis Conditore sit extructa. Egregia vero ar-
gumentatio! Tu negas existentiam fluidi nervi; Ergo indica-
re debes, cui alias usui universus ille cerebri, cerebelli & medul-
lae oblongatae spinalisque, una cum nervis, qui prodire inde dicuntur, apparatus inservire debeat? Quasi vero negotium esset usque adeo difficile vel intricatum, ad hocce dubium respon-
dere. Quis concipere potest ACTUM sine AGENTE? Quis AGENS praefigurare sibi potest sine organis sive instrumentis? Haec vero instrumenta in C. A. sunt musculi, nervi, membra-
nae, fibrae motrices &c. Taceo, universum corpus, quatenus plurimis aliis organis constat, nihil aliud esse, quam instrumen-
tum seu organum ANIMAE, imo absolute propter eandem stru-
ctum atque fabrefactum esse, ut variis ejus usibus recte inservire valeat, & quidem, quod maxime notandum, sine concursu flui-
di cuiusdam nervei, cuius quippe in variorum horum actuum rationalium, animalium ac vitalium administratione nullam sive necessitatem sive utilitatem agnoscere vel perspicere nobis licet. At vero, regerit AUCTOR: Non sequitur: Quia quis obtusa sua mentis

mentis acie in naturam purissimi & tenuissimi machinae hujus succi penetrare nequit, eundem omnino negandum esse. Ergone ipsi nervo succo officium sensus & motus denegandum erit? Doleo autem vehementer, me tam obtusa mentis pariter atque oculorum acie laborare, ut, quod ipse clarissime videt, ego tamen, optimo licet perspicillo vel microscopio oculum habeam armatum, id tamen perspicere non possim. At quid dicet vel cogitabit, si quos, eandem cum ipso hypothesin tuentes, in medium produxero, qui ingenue fatentur, succi nervosi indolem ita esse comparatam, ut nulli visus aciei sisti queat. Regeret sine dubio, aliud esse corporis, aliud, mentis oculis videre. Corporeis oculis illum, quem vocat purissimum atque tenuissimum succum, usurpari non posse, eadem forte, ut alii facere consueverunt, facilitate concedet: Sed, sermonem ipsi esse de mentis acie, instabit; Huic saltem subducere illum se non posse; Meam esse culpam, quod videre illum non possim. Verum suntne aliorum quoque oculi mentis ejusmodi glaucomate obducti, ut in succi hujus subtilissimi purissimique naturam penetrare nullo modo possint? Ex hypothesi Auctoris non videtur esse dubitandum; Sunt enim praeter me plures alii, qui suavis fabulae vanitatem agnovere eidemque propterea omnem fidem denegarunt: Ut solamen sit miseris, habuisse socios.

Deproperandum ad ultimum *Disputatoris* argumentum, quod ab auctoritate totum petitum est & sic sese habet: *Cum hanc etenim omnes prudentes medici succum nerveum ipsiusque officium non tantummodo afferuerunt, verum etiam idoneis rationibus & experimentis satis superque demonstrarunt;* Hinc dubio procul sequetur: Imprudentes, ne quid gravius dicam, esse illos, qui ejus non modo existentiam, sed & officium functionesque negant. Sed, uti auctoritatis allegationi nostra in arte nullum eminentem inter argumenta probantia locum relinquimus: Ita tanto magis idonea experimenta atque stringentiores solidioresque urgeo, imo ex postulo rationes, quae certius me aliosque convincere atque in adsensum pertrahere valeant. Sicuti autem *Disputationis Wittebergensis*

Bergensis Auctor veluti in transitu tantum, & suppresso nomine meo, famosam hancce controversiam tetigit: Ita Clariss. Dn. BURGGRAVIUS, Junior, *Medicus Francfurtensis ad Moenum ex professo tractandam eandem suscepit.* Et quemadmodum *Ille PSEUDO-APOLLINIS* odioso titulo me oneravit: Ita *Hic* ridicule sibi persuasit, sententiam APOLLINIS damnatoriam APOLLINE potius INSCIO conceptam fuisse, sicque personam saltem MERCURII ex PARNASSO me egisse, & quae sunt ejus generis satyrae plures, quibus scriptum BURGGRAVIANUM rectius forte atque commodius carere potuisset. Laudabilius multo & scopo praefixo convenientius egisset, si, missis allotriis, argumenta, quae systemati *spirituum nervosorum* opposita à me fuerant, adcurate ponderasset, aliaque digniora animosq; magis convincentia in eorum locum substituisset, sicque Lectoris animum de ejusdem veritate plenius convincere laborasset. At vero cum universa ars ANATOMICA nulla talia subministraret, hisce in angustiis constitutus varias rationes Philosophicas compilavit, quas tamen nullo hic numero habendas esse, eo majori fiducia adserui, quo notius est, meo in Scripto SPIRITUS ANIMALES ex FORO tantum MEDICO proscriptos, fuisse repraesentatos. Si sistema hoc majorem Philosophis, quam medicis, suo in foro utilitatem polliceatur, illam ipsis non invidebo. Ego propterea illorum circulos non turbabo. Caeterum, cum opposita juxta se mutuo posita magis elucescant, lubens patiar, ut BURGGRAVIANA SPIRITUUM NERVOSORUM VINDICATIO cum eorundem ex FORO MEDICO RELEGATIONE conferatur. Tu, Lector Candide, jure Tuo utere, judica meque favore tuo prosequi perge. Scribebam Francfurti cis Viadrum die 28. Septembris 1728.



§. I.

Dennium est, & quod excurrit, ex quo *Disquisitionum physiologico-pathologicarum triadem*, inscriptam: *Spiritus animalis ex foro medico relegatus*; conjunctim edidi, postquam sub *dissertationum Academicarum forma singulas seorsim prius in cathedra ventilandas propo- fueram eoque ipso censurae publicae eruditorum sponte subjeceram. Evidem hariolari facile pote- ram, parum me gratiae initurum apud eos, qui inveterato praejudicio, quod olim in Scholis ipsimet a Praeceptoribus suis avidissime haufêre, idque suis deinde discipulis quasi per traducem communica- cavere, semel sese mancipaverant; Imò potius metuendum mihi erat, ne crabrones graviter irritarem, multosque in me adversarios concitarem, qui calatum non modo in me stricturi, sed &, ut adamati spiritus, ab exilio suo solemniter revocati, patriis suis sedibus restitue- rentur, omnem operam impensuri forent.*

§. II.

Neque vero metum hunc plane vanum vel injustum fuisse, ipsa experientia satis comprobavit; Non multo enim post Dn. *Johannes Philippus Burggravius, Junior, Doctor Medicus Francofurti ad Moenum Commen- tationem medicam*, mihi inprimis oppositam, typis exscribi curavit, in qua universam doctrinam de *existentia spirituum nervosorum eorumque vera origine, indole, motu, effectibus & affectibus in corpore humano vivo, sano & aegro*, sese repetitum & experimentis pariter ac *observationibus tum medicis tum philosophicis confirmaturum esse*, liberaliter pollicetur, nullo alio fine atque scopo, quam ut *TANDEM ALIQUANDO*, (quasi, qui ante ipsum fuerant, parum vel nihil in exornando hoc systemate praestitissent) *suis verus valor suag₃ ex merito dignitas & laus maneat.*

§. III.

Et quis quaeso est, qui hoc Clariss. *Burggravii institutum*, quod tam utilem, tamque laudabilem scopum sibi habet præfixum,

A

male

male interpretetur? Cum enim, controversiam hanc praesente seculo fervidius, quam unquam, agitatam & ab his, (cum fucata systematis facies clarius indies denudaretur) novis quasi pigmentis exornatam, ab illis vero plane vanitatis falsitatisque crimine contaminatam, ac proinde HANNIBALEM quasi ante portas esse, probe observaret; Prudentiae pariter ac tempestivitatis negotium fore existimavit, si nunc, rebus ita constitutis & in critico quasi statu versantibus, arma arriperet, ac temerario, ceu vulgo judicatur, conatui, sistema Medicum reformandi indeque dogma, ad quod ceu asylum aliquod, cum in endandis difficultoribus quaestionibus aqua haereret, ne ignorantiam prodere viderentur plebi, hactenus gregatim confugerant Medici, rescindendi, omnibus viribus sese opponeret, quia occasionem posthaec calvam fore, facile intelligebat. Et quis est, repeto, qui id vitio ipse vertat? Dummodo, quod jure desideramus, argumenta atque dubia, quae contra existentiam functionesq; spirituum animalium in medium a me producta fuerant, legitime, &, quod caput rei erat, citra auctoritatis humanae praejudicium examinasset, quidque valoris illis insit, clare atque distincte demonstrasset. Jam vero, cum prolixa sua commentatione nihil ferme aliud egerit, quam ut ruinosum & interitui proximum sistema suffulciret, & interea difficultates, quas ego magno numero contra illud moveram, vel sicco pede praeterierit, vel extremis saltus digitorum apicibus tetigerit; Haud aegre laturum esse Clariss. Commentatorem, spero, si ingenue fassus fuero, plus se hac spirituum animalium vindictoria, universo systemati nocuisse, quam profuisse.

§. IV.

Proinde, rebus ita comparatis, firmiter apud animum meum proposueram, me nihil responsurum; Id quod eo minus probro mihi dari potuisset, quo notius est, suum unicuique pulcrum suamque in Republica libertatem sentiendi cuivis plenissime indulgendam esse. Percipiebam praeterea ex quodam meorum Auditorum, qui communibus cum Commentatore nostro studiis communiue Praeceptore in Academia Jenensi ante paucos adhuc annos usus fuerat, hominem esse fervidi ingenii, qui, missis realibus, pro pravo seculi more, solummodo personalia, sicuti non patula ipso in scripto Burggraviano specimina jam prostant, tractaturus, sicque totam controversiam sperato fructu privatus esset: Prudentiae utique ratio svadere mihi potuisset ac debuisset, ut item, ex qua Reipublicae Medicæ

Medicae salus minime pendebat, missam potius facerem, quam cum viro Juvene, qui honoribus Academicis totus adhuc aestuabat, quique pro ratione aetatis, in qua constitutus est, Juvenilium passionum impetui fraena nimium forte, quam par erat, laxatus esset, memet committerem. Inprimis, cum ex ipso statim opusculi frontispicio satis superque eluceret, quantopere Auctoritatis humanae praejudicio adhuc eum immersum esse oporteret, cum fateri ingenue non erubescat: Mirari se, *qua demum ratione fieri potuerit*, ut, postquam profundae indaginis & incomparabilis doctrinae laude Celeberrimus BOERHAAVE existentiam spirituum adeo solide, adeo concinne jam pridem vindicaverit, *QUIS QUAM* hos in dubium sit vocaturus, vel plane ex foro Medico proscripturus. Quasi vero *Institutiones Boerhaavianas*, ad quas Burggravius provocat, & quarum explicationem fine dubio aliquoties, cum ad pedes ejus confedit discipulus, audivit, vel ipse ego, vel quisquam aliis non evolvissem, rationesque, quae pro evincenda spirituum animalium existentia citato loco adferuntur, aequa animi lance non expendissem. Nullo interim jure praetendere a me potest, ut, quod ille in gratiam sui Praeceptoris, cui caeteroquin omnes honorum titulos, quos, nemine contradicente, meruit, plenissima forma lubens indulgeo, coeca fide credidit, ego pariter firmum ratumque habeam.

§. V.

Denique fata, quibus controversiae tales litterariae communiter expositae esse solent, quaeque in jurgia & rixas, litterato ordine penitus indignas, ut plurimum desinunt, deterrire me merito debuissent, quanquam in eo Clarissimo Viro lubens utique assentiar, *controversias litterarias, si dissentientes veritatem unice & candide quaerant, si controversam thesin accurate rimentur, atque, quo usq; illam perscrutati fuerint, sincere propo- nant, eximio suo usu haud carere*: Exemplo nobis esse potest famosa *controversia*, quae de veterum *Egyptiorum* sapientia & universa illorum philosophia inter Hermannum Conringium & Olaum Borrichium agita- ta fuit; Cujus antiquissimi populi arcana ex spississimis tenebris, quibus involuta erant, in tantam forte lucem protracta nunquam fuis- sent, nisi studium unius excitasset industriam alterius. Taceo *Car- resium*, qui cum Adversariis suis, quorum haud paucos nova sua phi- losophandi ratione sibi accersiverat, tanta egit modestia, ut Dispu- tantibus omnibus exempli loco hodie esse possit, quod imitentur. Quando vero *controversiae* sese accincturi, antequam lacescantur,

jam in sarcasmos erumpunt, uti Clar. Commentator haud dubie fecit, dum historiolam ridiculam Segeri, si fabula vera, mihi applicare haud erubuit, vel, si victoriam canant tropaeumq; erigere tentent disputantes, praelio nondum *absoluto*; Cujus iterum vitii reum sese reddidisse videtur Spirituum vindex, dum tractatulum suum ita obsignat:

Tendimus in portum, & viatis valedicimus undis.

Nemo facile crediderit, veritatem, unice & candide inquirendam, ejusmodi disputatoris verum & unicum scopum esse.

§. VI.

At enim vero, cum ex adverso mature quoque perpenderem, in suspicionem venire me posse, quasi vel caussae meae diffiderem, vel eo saltem fine fabulas de spirituum animalium indole & affectiōnibus enarraverim, ut scenae inservirent, vel, ut ludibrio publico totum systema exponeretur, silentium rumpendum ac publice ostendendum fuit, non per jocum, sed maxime serio me egisse, cum Spiritus animales patriis sedibus expuli & in extremam usque Arcadiam relegavi. Accedebat, gloriari nostrum, per litteras ab integris Eru-ditorum Societatibus certiorem se redditum esse, quod nempe in confutando scripto meo operam suam non male collocaverit &c. Quae omnia, licet sic, uti narrantur, sese haberent, nullum tamen justitiae caussae praejudicium essent allatura, cum veritas plerumque paucos imo paucissimos, error vero ut plurimum numerosissimos habeat sectatores.

§. VII.

Alea igitur cum hoc modo jacta sit, ea primum diluenda mihi erunt, quae in Prolegomenis in genere meo in scripto desiderat Cl. Burggravius, quorum.

Primum est: *In genere statum controversiae me non rite formasse.*

Alterum est: *Me discrepantes auctorum sententias plane erroneas cum confusis imo etiam distinctis de hisce spiritibus omnes invicem aequiparasse, ac tanquam unius ejusdemq; valoris relegasse.*

Tertium deniq; est: *Me potissima argumenta pro spirituum nervosorum existentia militantia &c. vel non omnia easq; conveniente ordine & connexione allegasse, plurima vero plane omisisse, sicq;, indicta causa, hosc Spiritus perpetuo exilio multasse.*

§. VIII.

Prima imputatio sic satis gravis est, meaque, quam sustineo, spartae

spartae, si vera esset, parum conveniens. Disputandi artificium, quod status controversiae formatione potissimum sese exerit, non facile adquiritur, nisi usu & exercitio. Qui disputandi caussa cathedram nunquam concendit, ille in bello hoc litterario aequo imperitus est, ac miles, qui praelio nunquam interfuit. Miles gloriosus apud Plautum multas quidem cicatrices in dorso, non aequo in pectore ostentabat; Et hi Athletae nostri litterarii, qui in Palaestra hac nunquam comparuere, batuorum more forte certari, sibi persuadebunt. Quaere-re ex Te liceat, Doctissime Burggravi, quoties disputandi caussa conscen-deris cathedram sicque statum controversiae, ut loqui vulgo amant, ipse formare didiceris? Respondebis, si verum fateri velis, semel vel bis: Se-mel minimum Te disputasse, omnes facile concedent, quia sine solem-ni tali specimine gradum honoresque Doctorales alias legitime non impetrassis. Unico tali actu acquiri habitum, non credo; Quae ergo ista tua est temeritas, quod Doctori Academico imputare non eru-bescas, quod toto 24. annorum spatio, quo tribus diversis in Uni-versitatibus Artem Medicam publice professus est, statum tamen Controversiae rite formare non didicerit?

§. IX.

Ut vero speciem justi prae se ferret accusatio, nihilque mihi im-putari videretur, quod cum veritate haud conveniret, id in primis reprehensione dignum judicatur, quod leges bonae Methodi nullibi ob servaverim, imo potius, praemissis multis alienis & ad rem non spectantibus, in medio circiter dissertationis secundae per modum definitio-nis vel descriptionis demum indicaverim, quid authores per spiritus animales in-tellectum velint? Quo ipso suspicionem haud inanem incurrerem, me hypothe-sin, quam destruere aggressus essem, vel risui saltem exponere studuisse vel uni-us alteriusve incauti Lectoris animum praecoccupare voluisse; Id quod signum malae cause merito haberetur. Verum enim vero non difficile mihi erit, proprio gladio jugulare Censorem nostrum: Suppono tantum 1.) Omnen methodum quidem arbitrariam, sed alteram tamen altera meliorem, rei^q, naturae convenientiorem esse. 2.) Omnen methodum esse vel syntheticam vel analyticam. 3.) Utramque in scholis quidem usitatam, interdum tamen hanc prae illa, interdum vero illam prae bac naturae rei & instituto praesenti convenientiorem, esse praefferendam. 4.) Jus atque potesta-tem plenam mihi fuisse, num hanc prae illa vel illam prae bac in con-cinnando tractatulo meo eligere vellem. Quibus ita positis & a quo-

vis haud dubie concedendis, nihil dissimulo, *syntheticam* prae *analytica* hoc in tractatulo concinnando mihi aptiore magisque congruam visam esse. Quem in finem, praemissis generalibus quibusdam, ut in disputationibus Academicis fieri adsolet, examino speciatim in *dissertatione prima* omnia ea argumenta, quae haetenus ab adserto-ribus spirituum animalium pro eorundem *existentia* demonstranda in medium producta fuere; Progredior deinde atque *dissertatione secunda* ad examen voco varias variorum tam antiquorum quam recen-tiorum sententias, quas de eorundem natura, essentia atque indo-le foverunt, sique tandem ex his ceu totidem datis atque praemissis hanc (§. XI. *dissert. II.*) trado spirituum animalium definitionem: Eos scil. nihil aliud esse, quam corpora tenuissima &c. Denique, ut nihil, quod ad legitimam status controversiae formationem pertinebat, desideraretur, hanc ipsam definitionem iterum *methodo analyticā* in singula sua, quibus constat, membra resolvo tandemque ostendo: Eam totidem ferme principii petitionibus, quot verbis, constare. Id vero, si non sit, statum controversiae formare, ego sane, quid fibi velit hoc suo desiderato BURGGRAVIUS, ignoro.

§. X.

Caeteroquin, si qua hic culpa laborarem, illam non mihi, sed sibi ipsi, & longe quidem justius, imputare deberet. *Turpe est Doctori, cum culpa redarguit ipsum.* Censura dignum is judicat, quod, cum in medio demum Dissertationis secundae indicaverim, quid per spiritus animales voluerim intellectum, Lectorem *suspenso quasi animo reliquerim* & hic proinde nesciverit, *an cum larvis & umbris pugnetur nec ne?* Et ipse tamen usque adeo sui immemor est, ut demum circa finem se-ctionis primae artic. VIII. sterilem aliquam, jejunam & totam ferme nominalem, ingenti insuper aequivocatione laborantem adferat spiritu-um nervosorum descriptionem, postquam non modo prolixam de-structura cerebri, cerebelli, medullae spinalis, & sicuti huc usque *Anatomici* cre-diderunt, nervorum inde prodeuntium recensionem, sed & integrum hu-morum *physiologiam*, ad scopum praefixum nec *directe* nec *indirecte* re-spicientem, praemiserat. *Quo ergo jure a me efflagitare jam potest, Lectori prius,* quam, praemissis praemittendis, *indicare me debuisse, contra quem acies sit directa, & quid vel quis ille sit spiritus, nempe animalis,* contra quem disputem. Imo potius unusquisque *amethodiae* vitium omni jure imputare mihi potuisset, si ullo alio, quam hoc ipso loco contro-

controversiae statum prius formassem: Econtra libenter scirem ego, quis Burggratio istam indulserit licentiam, ut, posteaquam supervacua & inutili prolixitate *Anatomem cerebri nervorumque nec non humorum physiologiam* tradiderat, in conclusione demum *syllogismi*, vel, si DIIS placet, *demonstrationis*, spirituum nervosorum definitionem subministrare necessarium duxerit?

§. XI.

Frustra igitur a Lectore suo praetendit, ut is ex demonstrata structura cerebri, cerebelli, medullae oblongatae atque spinalis, nec non ex habitu materiali C. H. speciatim sanguinis &c. ad existentiam, originem, indolem atque motum spirituum nervosorum concludat: Id enim haruspicinae foret quam simillimum.

§. XII.

Verum transeundum mihi est ad alteram imputationem, qua vituperio dignum habetur, quod discrepantes Auctorum sententias plane erroneas cum confusis imo distinctis de hisce spiritibus, omnes invicem equiparaverim ac tanquam omnes unius ejusdemq; valoris relegaverim. Quid huic imputationi veri vel falsi subsit, ex §. VII. VIII. IX. X. & XI. Dissert. II. addiscere licet, in quibus quippe sententias varias tam veterum quam recentiorum, quas de natura & indole spirituum animalium foiverunt, historice non modo recensui, sed & epicrisin meam adjeci, atque illarum nonnullas manifeste erroneas, alias obscuras esse, alias in generalissimis attributorum quorundam praefigurationibus subsistere, neutram vero genuinam eorum essentiam nobis adumbrare, ingenue sum confessus. Neque vero Commentator ipse audet negare, quasdam illarum sententiarum aperta falsitate, alias obscuritate laborare; Id tantum reprehendit, illas cum distinctis quorundam recentiorum opinionibus non eodem censu habendas, multo vero minus ex foro medico proscribendas fuisse. Verum cum conceptus unius hominis non dependeat a conceptu alterius, & unus, praejudicio in primis auctoritatis occupatus, pro distincto agnoscere possit, quod alter, ab eodem liber, obscurissimum esse putat: In pejorem partem haud interpretabitur, quod neutram allegatarum opinionum, quas de spirituum animalium natura fovent, adoptare potuerim, imo potius, cum theoriam medicam veram nihil juvent aut promoveant, sed potius confundant atque circulos ejusdem turbent, ex foro medico penitus ejiciendos esse censuerim. Propterea tamen in ullius viri celebris

celebris famam injurium me fuisse, jure accusari non possum: Tanto vero minus pro *otiosi ingenii lusu* habere licet conatus illorum, qui in *theoria medica reformanda & ab inutilibus speculationibus repurganda*, sunt occupati. In *Republica litteraria* unicuique liberum est, suam libere dicere sententiam. Ubi metus, ibi durissima servitus cervicibus hominum imminet. Quod vero non DEOS minorum gentium, sed artis nostrae Heroäs, quique omnium maximam hac nostra tempestate celebritatem sunt consecuti, & quorum plerique adhuc in vivis sunt, meo in scripto allegaverim, ideo factum est, ut, mortuos in leones me saeviisse, jure insimulari non possem. Caetero-quin DECORUM, cuius ego aequa ac aliis quisq; amantissimus sum, haud violat, qui, quod falsum vanumque est, vanum falsumq; dicit. Ad *hypocrisie* enim & parasiticam adulatioinem non sum natus.

§. XIII.

Tertia imputatio quodammodo injuriosa videri posset. Non utor ego in disputando stratagematis, nec, ut utar, opus est, omnium minime hac in controversia, quae sine ejusmodi artificiis componi potest. Veritas effugiorum talium non indiget; Mendacium vero latebras quaerit. Probetur, me argumentorum, quae pro receptis sententiis militant, quaeq; ab Auctoribus firmissima babentur, connexionem dilacerasse, & *consectaria ex illis pronissime fluentia*, quae vero extra connexionem non quilibet capere valeat, Lectori obtrusisse, vel *quaestiones ex demonstratis elicatas, omissa responsione, in contrarium allegasse &c.* Probentur, inquam, singula hujus imputationis membra, aut patiatur *Burggravius*, publice sibi exprobrari: Multa se mihi imputasse, quae cum veritate haud convenient. Ad *quaestiones* mihi propositas, & quidem ad primam: *Cur consectaria quaedam ex Boerhaavio saltē allegaverim, istis vero destruendis neutquam voluerim immorari?* Facillima est responsio: Neutquam enim in allegato §. X. Dissert. II. sermo est de *consectariis* quibusdam, ex doctrina de spiritibus nervosis fluentibus, sed exhibetur ibidem ex *Institutionum Boerhaavianarum* titulo de *cortice cerebri*, nervus totius negotii, nimirum *descriptio*, vel, si mavis, *definitio* dictorum *spirituum*, cui ex amissim respondet ea, quam Art. VII. §. 127. tradidit *Burggravius*. Quod vero singulorum ejus membrorum, id quod alioquin facillimum mihi fuisset, destructioni ex professo hic immorari nolue- sim, non ideo factum est, quasi gravitas rei, quod forte suspicatus *Commentator*, me deterruerit, sed quod pro praesenti scopo sufficere mihi

mihi videretur, monuisse: Cuncta attributa, larga satis manu fluido
nerveo concessa partim nimis generalia esse, partim vero officiis, qui-
bus consecratum est, contraria. Sufficere, inquam, hoc poterat, ut,
quid de *definitione Spirituum nervosorum Boerhaaviana* sentirem, Lectori
inde patesceret. Si vero tanto teneatur desiderio, prolixiorum sen-
tentiae hujus, nullis experimentis nullisque rationibus *solide unquam*
confirmatae, destructionem legendi, illi inferius plenissime satisfiet.
Ob eandem rationem reliqua, quae Clar. *Boerhaavius de Spiritibus ner-*
vosis docuit, & quae certissima (*Burggratio*, ejus discipulo & sectatori,
non aequi aliis) habentur, sicco pede transii. *Qui enim nervum*
praescidit rei, is vita & quasi anima privavit eandem.

§. XIV.

Quaerit ulterius *Commentator* noster: Cur ex eodem sagacissimo
Viro (*Boerhaavio*) sequentes quaestiones, omissa responsione, allega-
verim, nempe has? *An probabilius videatur, humorem hunc ultimo viis coecis*
sisti? *An potius crederes, refluere in primam, unde effluxit, scaturiginem?* *An tandem*
putaveris, exhalare ex corpore? Omisi, fateor, responsionem,
sed consulto omisi; Quia in prima *Institutionum Boerhaavianarum editione*
omissa fuerat. Cur? Quia ipsem dubitabat, num *affirmative*, num
vero *negative respondere deberet?* Consultius mea sententia erat, *affir-*
mative potius quam *negative respondere*: Difficultatem enim, quae
contra *spiritus animales* moveri posset, ubi scil. manerent, postquam
sub integrarum legionum forma, undiquaque in & per corpus distri-
buti, muniisque suis perfuncti essent, optime perspexit Vir sagacis-
simus: Quare (§. 292.) circulationem eorundem perpetuam statuit,
nempe hanc: *Quod, quum quolibet momento reficiatur novus (spiritus) adeo-*
que priorem posterior urgeat, videatur ultimus functus suo munere ex ultimis
filamentis impelli venuulis lymphaticis minimis, tam circa glandulas, quam alibi,
inde venis lymphaticis paulo majoribus, rursumque ex his ad lymphatica vasa
communia, quae valvulis praeditae venaे sint, tandem in venas & cor; Sicque
vere instar reliquorum humorum circuitum per vasa perpetuum absolvere &c.
Haec si vera esse credebat *Boerhaavius*, cur (§. 293.) proxime sub-
jungit: *An vero probabilius videtur, humorem hunc ultimo in viis coecis sisti?*
An potius crederes, refluere in primam, unde effluxit, scaturiginem? Si enim
vix haec verosimilia sunt, quare, vera esse, paullo ante adstruxit?
Quis hic nexus est inter antecedentia & consequentia? Nec juvat,
verba *Institutionum Boerhaavianarum* aliter sonare in editione, quae Anno

MDCCXII. Lugduni Batavorum prodiit: Sensus enim utriusque est propemodum idem.

§. XIV.

Proinde longe prudentius fecisset *Burggravius*, si *ironicis expressionibus* (Prolegomen. §. 8. pag. 5.) quae ut pugnus oculo quadrant, penitus abstinuisset; Id quod vel ideo lubentius facere potuisset ac debuisset, quia homo, mihi ignotus, nulla unquam injuria a me fuerat adfectus. In *Commentatorem* verba paulisper mutata, mea sententia, longe rectius quadrabunt. *Quid ipsi videtur, si spiritus animalis, hisce in angustiis constituti, supplices ad ipsum, ceu Patronum caussae venirent, eumque his vel similibus verbis, captandae benevolentiae caussa, alloquerentur:*

Excellentissime Dn. Burggravi, Junior,
Docto^r Medice Francofurti ad Moenum, in &
extra moenia Francofurtesia longe lateq; cele-
berrime, γνησιως Boerhaaviane, defensor Spir-
tuum animalium acerrime, eoq; nomine
Vir, omni laude major, reliqua.

Nos, *Spiritus Neroſi*, servi tui humillimi, in genua nostra procumbimus, quam devotissime Excellentiam Vestram exorantes, ut sortis nostrae miserta, in gratiam atque tutelam nos recipere haud dignetur. Excellentiam vestram latere nequit, quid hucusq; de statu atque conditione nostra murmuraverint medici; Suspecta scil. ipsis visa sunt omnia, quae de munib; functionibus nostris in scholis, ab immemoriali fere tempore, differuerunt Doctores; Ne multis Excell. Vestram moremur, eo prohdolor! ventum est, ut coram summo APOLLINIS Tribunali publice fuerimus accusati, quasi plerosq; praecedentium seculorum medicos naso adunco suspenderimus & ita infatuvemus, ut sibi persuaserint, nos eorum omnium, qui in Oeconomia animali geruntur, effectuum mirabilium auctores esse, imo nos, spreto subinde omni animae rationalis dominio,

summa

summa petulantia atque ferocia, equi indomiti & ferocientis
 instar, ima summis & summa imis vertere. Imo persuasi sumus,
 teste *commentatione medica* haud ita pridem publicam in lucem
 emissa, Vestram Excell. aequa favorablem de nobis sententiam
 fovere: Nos scil. non solum in corpore humano vivo & sano
 naturalem partium tensionem praestare, sed & *auctores* esse variorum
 motuum tam *voluntariorum* quam *automaticorum* imo & *ex utrisque*
mixtorum; Inservire itidem nos corpori pro *nutrimento & augmen-*
to partium solidarum, nec ullum in animali *sensuum* sive *exter-*
norum sive *internorum* sine nostro subsidio excitari, uno verbo,
 vinculum istud, quod est inter animam rationalem & corpus
 organicum, nostro demum interventu firmum, incolume &
 inconcussum servari. Neque, qui partibus nostris patrocinan-
 tur, unquam dubitarunt, in ipsum quoque statum corporis
 praeter naturalem seu morbosum dominii nostri limites esse ex-
 tendendos. Quanta vero ista sit felicitas, id, vel nobis tacenti-
 bus, intelligi haud difficulter potest. Ast heu miseris! Ex isto
 summo praerogativarum honorumq; fastigio in imam omnis
 contemptus abyssum e vestigio praecipitati sumus, dum haud
 ita pridem tonitruantem illam ex throno APOLLINIS vocem,
 sententiam nempe damnatoriam exaudivimus, quo *ex foro Me-*
dico proscripti inque triste exilium abire jussi sumus. Paruimus
 decreto, utut admodum rigoroso & oberravimus hucusque va-
 gis & incertis sedibus, anhelando undique circumspicientes, an
 quis commiserationis sensu tactus, res nostras licet valde vul-
 neratas in integrum restitui posse, aliquam nobis spem facturus
 esset? Exultavimus p[re]gaudio, postquam audivimus, TE,
 Clarissime Dn. BURGGRAVI, JUNIOR, sortis nostrae, quae
 satis misera est, misertum defensionem Nostrum, quam mille
 alii detrectaverant, in Te suscepisse. Evidem celare Tibi non
 possumus, SPIRITUS nomen frustra ha[ec]tenus tributum nobis
 esse; Nihil enim cum spiritibus, qui carnis aequa ac ossium sunt

expertes, habemus commune; Corporei sumus & materiales
 &, quicquid agimus, bruto tantum & corporeo modo peragi-
 mus, omnium rerum ignari nulliusq; rei consci; Quod *nervosi*
 vocemur, fit nobis invitis: Abunde convicti sumus, *nervos*, per
 quos ultro citroque nos decurrere fabulantur, *nulla gaudere cavi-*
tate. Nec ita deliramus, ut porulum, si quis adesset, subingredi
 audeamus; Audivimus enim, valvulis munita esse ejusmodi
 ostiola, quae, si regredi tentaremus, forte conniverent vel peni-
 tus occluderentur, sicque incarceratis, ut muribus in decipula,
 fame ac siti pereundum esset. Haud raro quoque tacite & in si-
 nu, ut dicunt, risimus, dum absurdas ac subinde plane contra-
 dictorias nobis proprietates medici vindicarunt, tales profecto,
 quas de Lemuribus suis, penatibus atque daemunculis vix levi-
 us enarrare potuissent gentiles. Verum tamen inficias ire neq;
 possumus neque debemus, quod junioribus artis Practicis, in-
 summis saepe angustiis constitutis, haud raro gratissima pree-
 stiterimus officia; Cum enim subinde ab aegrotantibus ingenio-
 sioribus, qui, quid in corpore suo gereretur, omnium optime per-
 sentiscere poterant, abstrusiores quaestiones, ad quas ex tem-
 pore respondere velex arena consilium depromere non poterant,
 proponerentur, haud raro ad nos, *spiritus animales*, tanquam ad
 portum confugere; Quo solo vocabulo audit, quasi ad fascinum
 conticuere, piscibus magis muti. Diuturna quoq; possessio be-
 neficio merito nobis esse deberet &c. Verum haec aliaque
 argumenta ut Tibi, Patrono caussae nostrae commendemus,
 non est necesse. Novimus satis, TE esse Virum acris ac fervidi
 ingenii, qui, quot qualesque tumultus ejusmodi innovatio sys-
 tematis medici sit excitatura, animo quasi praesago rectissime in-
 telligis. Tu hisce principiis in scholis ipsem fuisti innutritus,
 nec proinde a sententia tua, novatoris unius vel alterius gratia,
 non facile te dimoveri patieris. Paucis ut nos expediamus, cer-
 tissime confidimus, Te caussam nostram ita defensurum, ut
 tractatulum tuum hoc versiculo jure obsignare possis:

Tendi-

Tendimus in portum & viciis valedicimus undis.

Ita tamen, ut nemo exprobrare Tibi audeat, triumphum te cecinisse ante victoriam. Qua proinde fiducia freti, benevolentiae atque tutelae tuae totos nos quam humillime commendamus &c.

Quid jam tibi videtur, candide Lector? Anne probabile tibi videtur, Clariss. Dn. BURGGRAVIUM, Juniores, Doctorem medicum Francofurti ad Moenum, *spiritus animales* ab exilio suo solide revocasse aut in posterum revocaturum? An credis, APOLLINEM ob egregium hocce facinus IPSUM elogio: VIR omni LAUDE MAJOR, condecoraturum? SANE HAEC VIX VEROSIMILIA FIUNT.

§. XVI.

At vero alia adhuc *ironia*, qua mihi ipsi splendidos titulos tumidaque elogia tribuisse fingit, proindeque Johanni Segero, *Scholae Civitatis Wittenbergensis Rectori* comparare non dubitat, removenda est. Si, quod de Segero narrat, verum est, ineptiisse eundem, philautia occoecatum, dubio caret. Loquor *conditionate*; Nam complures ejus farinae narratiunculas etiam circumferri de Praetorio, Hallensis quondam *Scholae Rectore*, notum est, quas omnes veras esse, nemo facile crediderit. Saltem haud improbabile est, Virum Scholasticum in ejusmodi ineptias incidere potuisse. Nescio enim, quo fato fiat, eos, qui studia humaniora tractant, ut plurimum *paedantismi* charactere notatos esse. Quocunque enim modo in vita communi fese gerant, taceant, loquantur, rideant, plorent; Ex cunctis tamen actionibus *genius paedanticus* elucet: Idque longe adhuc luculentius adparet, si bella litteraria inter illos exardeant, sicuti specimine non uno ex *novellis litterariis* anno superiori intelleximus. Paria me cum Segero fecisse, unde probabitur? Si *Sententiae APOLLINIS damnatoriae*, qua *spiritus animales*, uti merebantur, in perpetuum exilium missi sunt, auctorem me esse credit, fallitur; Aliud quid arguit styli difformitas. Nec verus Author hic est ignotus, Vir in elegantiori litteratura haud leviter versatus, idem ille, qui tali inscriptione de fascibus Rectoralibus, in hac *Viadrina* primum suscepit, mihi gratulatus fuerat. Quod quasdam ex opusculo meo loquendi formulas, quae stylo ejus satyrico favere videbantur, mutuo acceperit, omni jure ipsi licebat. Quod summum veri nominis medicum & virum omni laude majorem me vocaverit,

adfectui ipsius, quo erga me ferebatur, tribuendum est; Caetero-
quin tales titulos nunquam adfectavi. Nec in video *Burggravio*, si quis
ipsum *Apollini*, *Aesculapio* vel *Hippocrati* ipsi aequiparaverit, imo plane su-
pra sortem omnium eorum, quos antiquitas DEOrum loco venerata
est, evexerit. Quid hoc ad me? Cadit interim inepta imputatio,
quod criminis (*monstrum juridicum* vocat, quasi monstra sua in arte a-
lerent JCti) reum me fecerim. Verbo, relatio est ex *Parnasso*, in qua non
tam *formam*, quam *materiam processus inquisitorii* attendendam esse duxi.
Cuicunque methodus illa displicet, illi, ut *revisionem Actorum* institu-
at, liberum est. Sed, ut ausus ejus feliores habeant successus, ex
animo opto: Nam *BURGGRAVIUS*, ne quicquam dissimilem, ma-
gno conatu nihil egit. Valet hic, quod tritum habet: Parturiunt mon-
tes, nascentur ridiculus mus.

§. XVII.

Ad postremum *Commentatoris* desideratum de properandum mihi
est. Conqueritur is, quod *observationes*, quod *experimenta*, *spirituum ani-
malium existentiam vindicantia*, quamquam fortissima omiserim, vel, licet illa du-
bio procul optime sciverim, scire saltem potuerim, imo debuerim, callide
tamen dissimulaverim. Fecisset hic sane aliquod operae pretium, si
tales observationes vel experimenta, quae existentiam *spirituum nervoso-
rum* in superlativo gradu probarent, allegasset aut *vindictoriae* suae
inseruisset. Sed ingens ubique *VACUUM* reperio. Non inconsulto
vel temerario plane ausu ad hoc scriptionis genus me ad cinxi, sed
celebriores tam veterum quam recentiorum, imo & recentissimorum,
qui que inter hos prae reliquis majorem nominis sui famam in *Aca-
demiis*, artem vel *docendo* vel *faciendo*, sibi adquisiverant, sententias,
seposito omni partium studio, mature examinavi: Sed profecto ni-
hil, quod apte & concinne inter se cohaereret, quodque vel *theo-
riae* vel *praxi* illustrandae inserviret, reperire licuit: Quare nihil e-
rat consultius, quam fabulosum dogma ex finibus artis quam longis-
sime removere. Nec tamen propterea, modestiae limites transiisse,
coärgui poteram: Quia, quod iterum iterumque moneo, nullum
unquam dogma in scenam productum est, quod plus *vaniloquentiae*
& *putidissimorum commentorum* sibi habeat conjunctum, quam *systema spi-
rituum animalium*. To πρεπον, quidque in *Republīca litteraria* deceat vel
non deceat, a *BURGGRAVIO*, *juniore*, non didicerim. Autument alii,
fuisse fulgar ex pelyi; Ego scapham dicendam esse scapham, constan-
tissime

tissime credam, nec mores, qui GERMANUM, non nomine sed omnia
talem decent, mutabo.

§. XVIII.

Caeterum, quod quis juris statuit in aliū, idem aliis in ipsum
competere, statuat necesse est. Plena hucusque libertate in meo
scripto censendo usus est BURGGRAVIUS; Nunc, quid de *Commenta-*
tione ejus medica, qua *spiritus animales* in exilium missos revocare & in
integrum restituere conatus est, sentiam, quidve *in genere* in *scripto*
hoc *BURGGRAVIANO* desiderem, eadem libertate declarare integrum
mihi erit.

§. XIX.

Desidero autem primum; Quod *nigrum non respondeat rubro*. Vitium
est, disputantibus admodum familiare, quod, cum ad argumenta
proposita respondere debeant, nec tamen possint, in thesi probanda
unice sint occupati. BURGGRAVII nostrum paria premunt fa-
ta. Non erat scil. quaestio, an thesin suam probare posset, sed in eo
nervus totius negotii vertebatur, ut ad difficultates, in contrarium
a me adlatas, distincte ac solide responderet. Argumenta vero, qui-
bus usus fueram, ad falsitatem totius systematis demonstrandam,
haec erant:

- I.) Ex omnibus antiquorum monumentis ne ullum unicum allega-
ri posse famosiorem authorem, qui hypothesi huic sincere fue-
rit patrocinatus; Et frustra in partes trahi *Hippocratem*.
- II. Incongruas multis respectibus esse denominations, quas *spiri-
tibus hisce vulgo sic dictis animalibus* haec tenus imposueré.
- III. Obscurissimam esse, imo inextricabili contradictionum laby-
rintho obvelatam, quam de *illorum natura & indole* tradiderunt, de-
scriptionem.
- IV. Tribus atque familias, in quas veteres pariter atque recentio-
res distinxerunt, *spiritus*, pro lubitu ac mero arbitrio effectas
esse.
- V. A nemine eorum, qui *existentiam & functiones spirituum animalium*,
sive, uti a BURGGRAVIO vocantur, *nervorum*, propugnarunt,
genuinum sive *secretionis* sive *collectionis* organon, in hunc usque
diem fuisse demonstratum.
- VI. Nec *solide*, i. e. *anatomice*, ab ullo adsertorum ostensos *canales*,
quorum ope eorundem *distributio* in corpore humano peragatur.
- VII. Meras principiorum petitiones redolere, quae de proprieta-
tibus

tibus & effectibus spirituum animalium in C. H. vivo tam sano quam aegrotante retulerunt.

VIII. Omnia denique maxime crucem figere spiritum propugnatoribus, quod realis eorundem existentia nullo unquam solido argumento ab ipsis fuerit comprobata &c.

§. XX.

Hae difficultates, vel, si mavis, dubia, adcurate solvenda fuisserint, si, quod operae valeret pretium, *Commentatione sua, mibi in primis opposita, praestitisse Clar. BURGGRAVIUM, Lectori suo persuadere voluisset*; Imo prudentius mea sententia fecisset, si primo, quod conceperat, proposito tenacius inhaefisset, atque in universo *Processu Criminali, spiritibus nervosis intentato revisionem Actorum revelasset*. At vero hoc ipsum nimis ei taediosum ac forte impossibile visum est. Ac proinde consilio mutato (id quod tamen posteriori multo sapientius erat) ad concinandum integrum *systema de spiritibus nervosis eorundemque origine, indole, effectibus aequa ac affectibus in corpore humano vivo tum sano tum aegro animum applicuit*; Quo tamen labore eo majori jure supersedere potuisset, quo certius convictus erat, complures jam ante ipsum imaginarium & interitui suo proximum *systema, licet frustra, suffulcire & a ruina sua vindicare ausos esse*.

§. XXI.

Non est ergo, quod speremus, *Commentatione BURGGRAVIANA, pro confirmando spiritum nervorum hypothesi, multum lucraturos esse eorundem fautores*. Verum in *scripto BURGGRAVIANO* desidero ulterius: Quod praejudicio auctoritatis totus adhuc sit immersus & quasi occoecatus *Commentator noster*, ut, quid verum, quid falsum sit, perspicere nequeat. Miratur is, qua ratione fieri potuerit, ut, postquam profundae indaginis & incomparabilis doctrinae laude celeberrimus BOERHAAVE, existentiam horum spirituum adeo solide, adeo concinne jam pridem vindicaverit, quam unquam factum fuit, quisquam hos in dubium sit vocaturus vel plane (quod ipsi prodigio proximum visum est) *systema doctrinae de spiritibus nervosis ex foro Medico relegaturus*: Ego vero miror, quod in allegato Capite *de cortice cerebri* (§. 236 -- 312. Instit. Boerhaaviana- rum) reperire non potuerim, quod ille invenisse sibi visus est, solidam scil. existentiae spirituum animalium demonstrationem, etiam si debitam animi attentionem omnemque applicationem adhibuerim.

Quae

Quae ratio? Nulla alia, quam quod ego ad lectionem capitum hujus animum ab omni affectu, quo communiter erga Praeceptores nostros ferimur, liberum attulerim: BURGGRAVIUS e contra, hisce principiis quasi innutritus fuerit. Quam difficulter vero ejusmodi praejudicia exuantur, per quotidianam experientiam tam notum est, quam quod notissimum.

§. XXII.

Desidero tertium in *scripto BURGGRAVIANO* majorem ingenuitatem, dexteritatem fidemque. Qua fronte (Prolegomen. §. 9. pag. 6.) imputare mihi potest, quod *meritissimos & Excellentissimos Viros*, BOHNIUM, BERGERUM, HOFFMANNUM & BOERHAAVUM, quos ille *spirituum animalium* Patronos esse existimat, *vanae doctrinae, fabulosi dogmatis, vaniloquentiae & putidissimi commenti coärguerim*. BOHNIUM, de Academia Lipsiensi meritissimum Virum quod attinet, illum loco citato (Dissert. mear. Physiol.-Pathol. I. §. IV. p. 8.) ipsemet meas in partes traho atque de eodem pronuncio, quod eorum omnium, de quibus §. praeced. locutus fueram, *Willisi, Mayovii, Borelli & Pascalii* vaniloquentiam rectissime animadverterit, ac judiciose, prout solebat, monuerit, prudenter quidem, et si minus philosophice, fecisse illos, qui conceptu generalissimo rem comprehendendo, pro corporibus subtilissimis ac mobilissimis habuerint *spiritus animales*; Tantum abest, ut vaniloquentiae ipsum coärguerim. Luculentum candidi hujus Senis testimonium inferius (Dissert. III. §. 1. p. 78.) pro me allegavi, quo, quae olim de *spirituum animalium existentia, indole & effectibus* docuerat, solemnissime revocat, ingenuaque confitetur: *Vitiis ignotis, aut de quorum EXISTENTIA INCERTI, medelam adferri difficulter posse*. Proinde votis omnibus exoptavi, ut candidam Venerandi hujus Senis confessionem imitarentur omnes, quorum oculos animosque gratuita hypothesis fucato suo splendore hucusque fascinavit; Imo pari candore ardoreq; exopto, ut Clar. BURGGRAVIUS, cui non vulgares animi dotes indulxit alma mater, Natura, deposito tandem auctoritatis praejudicio, resipiscat veritatemque agnoscere studeat!

§. XXIII.

De BERGERO ejusque eleganti tractatu *de natura humana* nunquam aliter, nisi cum modestia sum locutus, tantum abest, ut pro rigido *spirituum animalium* sive adsertore sive propugnatore eundem habuerim. Graviter Celeberrimus Vir non tantum reprehendis

mores hominum, qui in explicandis rerum naturalium phaenomenis, cum causae minus expeditae sunt, libentius ad PRINCIPIA IGNOTA & intellectu ardua, quam sensibus obvia configunt, sed & clare edifferit, nihil causae esse, quamobrem res, quum nihil opus fuerit, multiplicemus & praeter lympham, cerebrum nervosque rigantem, SPIRITUM aliquem ANIMALEM, vitalis, ut multi volunt, spiritus, quem in corde vel sanguine gigni aut haerere putant, progeniem comminiscamur, atque ad explicandas, SENSUUM & MOTUUM operationes in partes vocemus. Quae si ita sese habeant, videat iterum BURGGRAVIUS, eximius DECORI & MORALIUM Doctor, qua fide mihi imputaverit, quod meritissimum hunc Virum vanae doctrinae, fabulosi dogmatis, putidissimi commenti &c. more in *Republica litteraria* plane non decente, coärguerim? Ipse potius BERGERUS spirituum animalium sistema pro commento habet.

§. XXIV.

De Clariss. BOERHAAVII institutionibus medicis, ex quibus sententiam ejus de spirituum nervorum natura & effectibus hausí, perhororifice itidem sensí, nullumque citato loco (Dissert. II. §. X.) occurrit verbum, quod vel honori vel existimationi ejus injurium esse queat. Quod idem etiam de sententia Celeb. HOFFMANNI, quam §. præcedente retuli, judicandum est. Ut iterum BURGGRAVIO, ubinam DECORUM a me violatum sit, probandum incumbat. Quis vero Commentatori nostro eam concessit licentiam, ut in me immerntem impune & more in *Republica litteraria* minime decente, debacchari meque ejusdem cum Segero stoliditatis reum facere potuerit, merito ex ipso quaesiverim?

§. XXV.

Verum transeant haec similesque imputationes, quas quippe confitas esse omnes, haec tenus satis superque a me demonstratum est. Certissime quoque persuasus sum, omnibus hisce allotriis, ad summam controversiae nihil conferentibus, *Commentationem BURGGRAVIANAM* carere omni jure potuisse; Imo vero, si modesti Disputatoris persona fungi voluisset, carere merito debuisse. Potius itaque ad ventilationem primae ac principis difficultatis, quae existentiam spirituum animalium concernit, me converto. Proinde arrige jam aures, Lector, novamque a BURGGRAVIO, pro existentia eorundem militantem demonstrationem expecta! Tu, ô LUCINA, para TE, ac parturienti fer opem!

§. XXVI.

§. XXVI.

Putasne vero, Nostrum alia, quae magis stringant, quaeque majori polleant efficacia ad convincendum eos, qui levi fabulae repudium misere, argumenta in medium esse producturum? Falleris; Eadem enim, qua alii, & ille chorda oberrat. Admodum quidem operosus est in totius *Sectionis primae membro primo*, ut septem integris capitibus ex *Vieussenii*, *Willisi* aliorumque recentiorum Anatomicorum scriptis integumenta cerebri eorumdemq; vasa, deinde substantiam cerebri atque cerebelli tam corticalem quam medullarem, origines itidem & insertiones nervorum, uti totius C. H. partes solidas (ex hypothesi) componunt, descriptas sistat: At, inquires, cui bono? Quorsum quaeſo uniuersus hic adparatus spectare debet? Non aliorum, quam ut *universae doctrinae de spiritibus nervosis tandem aliquando suus verus valor constet, suaque ex merito dignitas & laus maneat*. Quae verba etiamsi non levem ambitionem spirare videantur, aequo tamen animo tolerari tamdiu possunt, donec, quod tanta liberalitate pollicitus est BURGGRAVIUS, reipsa etiam praestiterit.

§. XXVII.

Hoc potissimum fine (Artic. VIII. ejusdem Sectionis) ei sese momento accingit, cuius gratia arma in me strinxit. Princeps scil. quod contra hypothesin spirituum animalium in medium produxi, dubium, versatur circa realem eorundem existentiam, quam a nemine hunc usque in diem demonstratam, imo ipsa sua natura indemonstrabilis esse, *Disquisitionum Physiologico - Pathologicarum prima* disertis verbis adserui, eaq; de cauſa rationes cunctas, quae in contrarium allegari solent, prolixe pariter ac libere examinavi, ut, si quid haberent Viri docti, quod monerent, eadem id libertate, pace mea, facere possent. Cum igitur cardo rei in eo versetur, ut, quam spirituum horum nervorum existentia solide evinci prius non possit, quam structuram nervorum tubulosam esse, invictis argumentis fuerit demonstratum; Hinc tota hac sectione id potissimum negotii sibi datum esse, recte existimat Clar. Burggravius: Hoc enim rite probato, reliqua sua sponte corruant, necesse est.

§. XXVIII.

Quando vero de tubulosa five canaliculosa cerebri, cerebelli atq; medullae oblongatae & spinalis, nervorumque, qui prodire inde dicuntur, substantia sermo mihi est, non interſtitia ea intelligo, quae

inter fibras, ex quibus fasciculi nervosi compinguntur, necessario relinquuntur, sed cavitatem continuam, quae a praedictis partibus per totam nervi continuitatem ad ipsas usque partes, quibus inseritur, protensa est.

§. XXIX.

Talem demonstrari, omni jure postulo. Talem tamen a nemine unquam solide demonstratam esse, imo sua natura penitus inde monstrabilem esse, iterum adsevero. Evolvamus proinde Institutio-nes Boerhaavianas earundemq; caput de *cortice cerebri*, ad quod potissimum provocat *Burggravius*, videamusque, an tam solide tamque concinne, quam unquam factum fuit, existentia spirituum nervosorum vindicata fuerit?

§. XXX.

Hujus rei gratia (§. 239.) praesupponit is primum: Quod, quum singulo cordis ictu ingens admodum portio sanguinis magna & directa vi impellatur cortici (cerebri) ille quadam systole & diastole, licet parva non modo agitetur, sed & adesse debeant vasa venosa ubique ad fines arteriarum, licet visibilia esse nequeant, ab tenuitatem suae membranae & molis: Imo adesse quoq; debeant quadam secretoria ex ultimis illis arteriolis, ut ubique exorientia, ut & emissaria, quamvis haud videri queant. Cumq; haec exilitas, ut porro (§. 240.) ratio-cinatur Boerhaavius, effecerit, ut ratio non satis firma supplere conans, quod negat inspectio, diversa cogitaverit: Adoptata fuit recepta Malpighii sententia, quae fabricam glandulae hic induxit: Sicque creditum est, corticem Cerebri (§. 263) deprehensa evidenti cum fabrica glandulae similitudine, vere glandulosum esse: Ita quidem, ut arteriolae carotidis & vertebralis ramuli minimi, hic convoluti in structuram glandulae, infinitis minimis osculis exhalarent subtilissimum ex cruento appulso humorem, eumq; instillarent folliculo suo, inde pellendum deinceps in emissarium, reliquo inde per venulas reduculo in sinus. Atque hos folliculos mini-mos glandulosos, docet ulterius (266.) Boerhaavius, emittere tenues fibras, albas, compactas, quibus adunatis fiat callosum medullosumq; corpus, cui cortex incumberet & ne exteretur concrescens tam in cerebro quam in cerebello: Ita ut nullibi sit corticalis substantiae finis, ubi non deprehendatur simul ipsius callosi vel medullosi corporis inchoamentum: Ex quibus omnibus tandem insert atque colligit: I.) Fibras basce canaliculos tenuissimos (§. 274.) pervios esse, qui in se excipi-plant humorem corporis humani omnium quidem subtilissimum, qui fabrica mirifica corticis praeparatus, secretus, atque vi in has fistulas impulsus sit, ex omni quidem parte hujus in medullam oblongatam collectus. II.) Partes, hoc fluidum componentes (§. 275.) esse solidissimas, tenuissimas, mobilissimas, simplicissimas, fluidis-

fluidissimas omnium humorum corporis nostri: Uno verbo: DARI SPIRITUS ANIMALES.

§. XXXI.

Verum in hac ipsa deductione non pauca occurunt, de quibus (salva caeteroquin Clarifs. Boerhaavii auctoritate) optimo jure dubitari posse videtur. Primum enim in toto hoc ratiocinio nullus est nexus. Adscendit ingens sanguinis quantitas ad corticem cerebri; Ergo sit hoc secretionis cujusdam gratia; Ergo ad fines arteriarum adesse debent (absoluta quasi necessitate) quaedam *secretoria*, ut & *emissaria*, **QUAMVIS HAUD VIDERI QUEANT.** Quis postulaverit ab alio, sensus communis compote, ut in gratiam alterius simpliciter credat, quod nec sensus ullus adsequitur, nec ratio ulla *a priori* svadet. Probetur, ad corticem cerebri ideo tantum sanguinis adsurgere, ut secretioni cuidam subserviat, & quidem humoris cujusdam, ut a Clar. Boerhaavio describitur, solidissimi, tenuissimi, mobilissimi, ejus scil. qui functionibus animalibus, sensui ac motui inservire debeat.

§. XXXII.

Deinde solius hypotheseos causa adoptata fuit recepta *Malpighii* sententia de glandulosa corticis cerebri substantia, quam, uti Hippocrates dudum auctoritate sua muniuit; ita eandem quoq; sequentium seculorum Medici, Bohnius, Stockhamerus, Bidrous, Fracassatus aliquique adprobabarunt: *Ruyshio* vero, accuratissimo aevi nostri Anatomico, tota ista traditio suspecta visa est: Quare, postquam solerti dexteritate *vasa sanguifera* replevit, ut minutissimi ramusculi infarcti, tomenti instar ipsi obvenirent, perspicue observavit, *corticalem cerebri substantiam* ex meris *vasis* *sangviferis* diversimode combinatis constare, & arterias minutissimas e piae matris facie interiore prodeentes, musci speciem prae se ferre. Demonstrat itaq; *corticalem cerebri substantiam* *musci* & *tomenti* speciem representare, illudque *tomentosum* nibil aliud esse, quam protractas *vasculorum* *sangvineorum* *extremitates* &c. Huic plenissime adsentitur Celeb. *Heisterus*, qui certe, si ubique in aliis visceribus, hic tamen, (corticali nempe seu cineritia cerebri substantia) glandulas demonstrari non posse, satis persuasus est. Ita vero si comparatum sit cum *Malpighiana* hypothesi de glandulosa corticis cerebri substantia, ea, quae illi superstuuntur, sua sponte corruant, necesse est.

§. XXXIII.

Commentator noster paullo quidem aliter probationem *existentiae*

Spirituum nervosorum adgressus est; Sed, qui penitus eam expenderit, eadem ipsum chorda oberrasse, facile deprehendet. Praesupponit autem & fundamenti loco substernit: In nulla corporis humani parte vel punctulum determinari posse, in quo nervus non reperiatur. Quam suam positionem probatus, de *musculis* pronunciat: Eorumdem fibrillas tendineas aequae atque carneas simplicissimas nihil aliud esse, quam *fibrillas nerveas*; *Arteriarum* extremitates ultimas uti in cerebro; Sic & in aliis partibus *tubulis nerveis* similes reddi credit. Membranam extus & intus cor & sistema vasorum obducens, nerveam esse; Imo ipsa quoque ossa hic non esse excipienda, sed pariter *nerveis ex fibris* componi existimat. Tandem vero, ne auctoritas deficiat, quibus paradoxis talibus Anatomicis fidem aliquam conciliat, *Wepferum*, *Helvetiorum Machionem* & *Boerbaavium*, *Batavorum Aesculapium* suas in partes vocat, & ex illorum scriptis novam hanc & in *Anatomicorum* scholis hactenus non auditam sententiam comprobare contendit.

§. XXXIV.

Prius vero, quam de eadem meum feram judicium, audienda est folemnissima ejus protestatio (Art. VI. §. 87. p. 23.) ne, si quid contra hanc modo propositam thesin monendum mibi videretur, per consequencias argumentarer, hunc fere in modum: *Tu scribis, tu affirmas* hoc vel illud; *Hinc sequitur* hoc vel istud, sed, ut per rationes & experimenta thesin istam destruere adniterer, petit. Verum haec ipsa ejus protestatio maximopere mihi suspecta esse videtur; Jure enim metuit, ne permulta inde absurdum haud difficulter negti possint, quae omnium partium H. C. miram confusione post se trahant, si totus homo nerveus esse fingatur. Ubinam manet cerebrum cum cerebello & medulla oblongata atque spinali? Creditne BURGGRAVIUS, has omnes partes nerveae quoque indolis esse? Ubinam manet cor, pulmones, hepar, splen, pancreas, renes, uterus aliaque viscera, quorum omnium structuram parenchymaticam, i. e. suo quodque modo fabricatum esse, veteres jam agnoverunt. Experimenta, ad destruendam ejus opinionem ut adferam, a me nullo jure praetendere potest, cum ipse BURGGRAVIUS, cuius potissimum officium erat, novam talem & paradoxam opinionem experimentis confirmare, nulla attulerit, sed, quicquid hic adseruit, pro mero arbitrio & fingendi libidine assertum ab ipso sit. Rationes vero, quibus ab aviis histre in viam regiam reducatur, in medium utique producendae sunt.

§. XXXV.

Non potest autem salvo stare tali nova haec assertio: I.) Quia unaqueq; pars propter specificam suam, qua gaudet, structuram, in C. H. est id, quod est, ac proinde ab omnibus aliis partibus, struetura sua ab illis discrepantibus differt. Unde musculus non est glandula, glandula non est nervus, nervus non est cartilago, cartilago non est membrana, membrana non est os, os non est tendo, tendo non est arteria, arteria non est vena, vena non est vas lymphaticum, atque ita deinceps. Et quamvis musculum in utroque sui extremo in tendinem abire videamus; Est tamen manetque inter fibram muscularam ac tendinosam perpetua differentia. Id quod sponte etiam agnoscere videtur BURGGRAVIUS, quando fibras motrices tendineas a carneis manifeste distinguit. Nec obstat, quod utraque, etiam *in exilibus fibris unum continuum constituere* videantur; Quia musculum, cum instrumentum motus esse, atque pro re nata vel contractioni vel extensioni &c. inservire deberet, diversis quoq; fibris, carnosis aequae ac tendineis instructum esse oportebat.

§. XXXVI.

Qua insuper verisimilitudine probabit *Noster*, ultimas arteriarum extremitates, uti in cerebro, sic & in aliis partibus fieri tubulis nerveis similes? Arteriae, quod sunt, illud esse nunquam desinunt, etiam si capillares tandem illarum extremitates evadant. Destinatae scil. sunt sanguini, a centro ad peripheriam partium devehendo, in nerveas vero fibrillas nullibi desinunt, quia alias suum mutarent officium, & sensui potius excitando quam sanguini distribuendo inservirent. In tubulos denique nerveos tanto minus converti possunt, quo certius est, ne ipsorum quoque nervorum substantiam tubulosam, sed undique solidam esse.

§. XXXVII.

Quid vero dicemus de ossibus, partibus C. H. durissimis & solidissimis? Suntne illa ex fibris quoque nerveis contexta? Non dubitat affirmare BURGGRAVIUS, hypotheseos suae tenax. Unde vero est, quod ossa, demto periostio, sensus omnis sint expertia? Quid ad haec regeret *Papinus*, qui machina a se inventa ossa in mollem & butyri instar tractabilem massam brevi temporis intervallo reduci posse, ipso opere satis demonstravit; Documento admodum manifesto, ex longe alia, quam nervea textura constare ossa.

§. XXXVIII.

§. XXXVIII.

Auctoritas Wepferi & Boerhaavii, ad quam utramq; provocat *Commentator*, difficultatem non solvit. Prior enim, postquam dixerat, fibras ventriculi & intestinalium, imo etiam cordis & omnium muscularum, nihil nisi nervos esse: Mox tamen, semetipsum quasi corrigens, subjungit: Aut proxime ad illorum naturam accedere. Paucisq; interiectis ita pergit: Licet nervus, musculum transiens nec omnis in fibras illius impendatur, id tamen in vicinis musculis sit, atque eosq; progrediuntur, donec tandem in membranas, adaequatum tactus organon absumentur hanc ratione terminentur. At vero posterioris enunciatum meritis niti conjecturis, ipsa ejus verba credere nos jubent: Si contemplamur, inquit, ingentem molem cerebri &c. Crederemus FERE, omnes partes solidas corporis contextas esse fibris nerveis atque iis constare. Quem autem scopum, putemus, habuisse BOERHAAVIUM, ut totum fere hominem nerveum esse sibi imaginaretur? Nullum alium, quam ut inde tandem conficeret: Has fibras esse nervi ultimi, involucro orbati expansionem tenuissimam INTUS CAVAM ac SPIRITU PLENAM, qui detur a nervo illo ab origine ex cerebro vel cerebello, vi cordis assiduo.

§. XXXIX.

Clariori haec omnia luce radiabunt, si nunc in veram nervorum originem adcuratius inquiramus. Nego autem, nec tamen sine sufficienti rationum pondere, ullum nervum sive ex oblongata sive spinali medulla, tanto vero minus ex cerebro ipso prodire: Omnes potius ac singulos cum Clariss. GOHLIO, *Actorum Medicorum Berlinensem Auctore*, ex meningibus, praedictas partes obvolventibus, originem suam trahere adsevero. Idque mihi persuadet primum ingens illa diversitas, quam inter cerebrum, cerebellum, medullam oblongatam atque spinalem & inter nervos, quos elargiri partibus C. H. hucusque tantum non omnes credidere Anatomici, sine operoso scrutinio deprehendere licet omnibus. Cerebrum enim una cum productionibus suis & propaginibus ad os sacrum usque, molle est, flaccidulum, omnis tensionis tonicae per se expers, imo ipsa spinalis medulla, sicuti ex Vieussenii observationibus recte adnotavit Noster, cerebro multo mollior est, adeo ut, si noctu una cum cerebro aeri exposita relinquatur, promptissime dissoluta prae nimia mollitie, fere calidae pulticulae instar, diffuat: Nervi contra sunt funiculi duri, tensi, compacti, & quod caput rei est, exacte solidi. Quis autem credit, tam subito substantiam medullarem cerebelli & adnexae spinalis

spinalis medullae suam indolem mutaturam, & a naturali sua molitie ad statum rigidae tensionis esse transituram?

§. XL.

Quod vero a meningibus potius, quam medullae oblongatae vel spinalis substantia medullari nervorum origines repetam, credere me jubent historiae portentosae partum, fine cerebro & crano natorum, & quidem, quod merito mirere, vitalium. Memoratu in primis digna est observatio *abortus septimestris*, sine cerebro & cranio nati, atque per undecim horas viventis, in quo tamen membranae, cranii basin contegentes, minime desideratae fuerunt, quae circumstantia vel ideo solerter penitusationem meretur, quod in reliquis parallelis observationibus foetuum, sine cerebro natorum, quas ex aliis scriptoribus fide dignis (Art. II.) praelaudatus Auctor ad fert, & quorum alii non horas, sed integros dies vixerunt, nullibi meninges aut saltem earundem analogon quoddam fuerit desideratum. Et ne quis excipiat, deficiente licet cerebro, non defecisse tamen spinalem medullam, ex qua nervi, vitalium actuum authores legitime prodierint: Respi ciatur quaeso ad foetum, de quo in *historia Academiae Parisiensis scientiarum* mentio fit, qui non tantum sine cerebro, sed & sine cerebello & medulla spinali duas integras horas vixit sensusq; indicia de se conspicienda praebuit. Dn. Mery similem vidit foetum, in quo pariter neque cerebrum neque spinalis medulla inventa, qui nihilo secius 24. horas supervixit parumque nutrimenti adsumpsit. Et licet Mauritius Hoffmannus casum foetus allegaverit, in quo, praeter contenta cerebri, ipsae quoq; meninges defecerunt, optime tamen jam superius laudatus Goblius animadvertisit, hunc casum nervorum origini, quam meningibus vindicavimus, nihil adferre praejudicium; Cum fateatur Hoffmannus, thecam vertebrarum cervicalium & dorsalium membranae quadam forma succinctam fuisse, quae illarum vices praestando sensum & motum excitaverit. Vid. Auctor. Medicor. Berolinens. Tom. VIII. Ex quibus omnibus hanc elicit conclusionem Expertiss. GOHLIUS: Quod, cum in historiis foetuum a se enumeratis defecerit quandoq; cerebrum & cerebellum, quandoque ipsa quoque medulla spinalis, & sensus tamen motusq; nonnullis illorum constiterit, ipsae contra meninges nullibi fuerint desideratae, inferri inde, liceat: *Membranarum meningearum longe indispensabiliorem esse necessitatem, ad stabiliendum sensum*

Tensem & motum animalis viventis, quam cerebri, cerebelli & ipsius plane medullae spinalis.

§. XLI.

Hanc autem veritatem ulterius sponte nobiscum agnoscit solidusque demonstrat Clariss. GOHLIUS ex proportionata vitali tensione nervorum, quae quippe ad sensum motumque in animali vivo excitandum requiritur; Quia cum destituatur cerebrum una cum medulla oblongata atque spinali, utpote quae potius mollis est, flacidula facileque diffluens; Consequitur hinc: Nec sensum nec motum procedere posse a talibus nervis, qui, ut saepius allegatus GOHLIUS adcurate ratiocinatur, in progressu per corpus fiunt duri, in origine vero, quae communiter agnoscitur, ita molles sunt atque flaccidi.

§. XLII.

¶ Porro, si cerebrum vel adnexae eidem medullae, oblongata aequac spinalis nervis suum concederent ortum, in primis vero, si per tubulosam earum substantiam, ceu fingitur, spiritus animales seu nervosi defluere deberent, ad sensum motumque in partibus excitandum, tunc necesse foret, ut suo quoque gauderent motu. At vero, cum, quantum constat, praedictae partes nullum per se motum habeant, nisi quem forte a meningibus mutuantur, sensu quoque, ceu ipse Aristoteles dudum agnovit, destituantur: E contra vero meninges manifesto tam constrictorio quam relaxatorio motu, qui systolicum ac diastaticum cordis quodammodo aemulatur, sint instructae, sicuti in Trepinationis actu ad sensum patet; Sequitur: Hasce partes cunctas, suum ut nervis ortum subministrent, ineptas esse.

§. XLIII.

Haec autem a BURGGRAVIO hic supposita, nullibi vero demonstrata nervorum ex medulla tam oblongata quam spinali origo servire eidem debet, ut, cum medullarem harum partium substantiam canaliculosam esse credat, inde quoque tubulosam nervorum structuram deducat atque evincat. Et hoc est illud praesentis doctrinae momentum, in quo a me dissentit *QUAM MAXIME*. Dissentit inquam; Quasi vero solus BURGGRAVII dissensus, demonstratione solida non suffultus sufficeret, ut Lectoris animo aliis de spiritibus animalibus conceptus ingeneretur. Hic interim praecipua sua in me tela evibrabit *Commentator*; Proindeque, si hic caussa sua exciderint spiritus, restitucionem in integrum frustra sperabunt in posterum.

§. XLIV.

Negavi scilicet, nervos ulla continua cavitate gaudere, imo potius exacte solidos esse, quaeque momentaneos ejusmodi itus ac redditus, accessus ac recessus spirituum animalium, quales vulgo finguntur, non patiatur, audacter adserui. Provocavi ad Cabrolium (qui etiam in partes vocat Hippocratem atque Galenum) in primis vero ad BIDLOUM, qui, licet hoc negotium ex professo tractaverit, omni tamen adhibita industria nihil obtinuit, sed ingenue tandem fateri coactus est, de spirituum fluxu per nervos ipsum vestigia quaedam detegere NUNQUAM potuisse.

Media, quibus nervorum concavitas, nempe continua, quaeque a supposita canaliculosa medullari cerebelli partiumque eidem continuarum substantia ad partes propagari dicitur, in apricum deducenda, sunt vel ligaturae eorundem, vel injectiones liquorum coloratorum sive ipsius quoque mercurii vivi, vel insuffratio flatus mediante tubulo exili, vel modesta tenuissimi cujusdam styli immissio. Cunctis hisce adminiculis in detegenda tubulosa nervorum structura usus est BIDLOUS. Ligaturas injectis nervis, nec tamen intumescentiam sive supra sive infra ligaturam observavit unquam, etiam si optimo microscopio Leuwenhoeckiano eandem exploraret. Dissecuit & resegit nervum; Nec tamen de utraque extremitate ejusdem humorem seu succum stillitasse, observare ipsi licuit. Tentetur ab aliis injectione liquorum coloratorum, materiae y. g. ceraceae, methodo Ruyshiano peragenda; Quo modo subtilissima vasa sanguinea, periostium aliasq; partes subtilissimas pervagantia detexit exercitatissimus & ingeniosissimus Amstelaedamensis Anatomicus, RUY SCHIUS. Imo iniciatur mercurius vivus, qua ratione alias vasa lymphatica, quae in cadaveribus difficillime deteguntur, in apricum deduxit NU CKIUS: Omnes tamen hosce conatus vanos esse atque inutiles, reipsa experietur artifex, qui id laboris in se suscipere haud fuerit dignatus. Tentetur denique immissio flatus mediante subtili tubulo; Quo medio vascula lactea, in ductum thoracicum sese insinuantia imo totam hujus concamerationem detegere licet. Vel immittatur tenuis stylus, qui cum capillo certet; Nec tamen explorabitur cunctis hisce modis ac mediis tuborum nervorum existentia. Imo, pace mea, macerentur, coquantur, assentur nervi; Nunquam tamen tubulosa eorum substantia inde innoteſcat. Qua etiam in re Clar. BOERHAAVIUM

plenissime nobis consentientem habemus, qui quippe (§. 289- Instit.) sponte fatetur: *Humoris bujus, liquidi nempe nervi praesentiam & motum nullum assequi oculum; Ligaturas, vulnera, puncturas, sectiones, autiam aëriam, injectiones, non valere oculo illum exhibere; Cavitates nervorum NULLA ARTE aciei visus objici posse &c.* Quo testimonio, licet omni exceptione majori, si nondum sit contentus, alium mihi liceat citare testem, non minoris in orbe erudito celebritatis, Excell. D. HOFFMANNUM; Ingenue is (Med. Systemat. Tom. I. Part. III. Cap. I. §. XIV.) confitetur: Se affirmare non posse, *nervos esse fasciculum canaliculorum, qui intus cœvi, liquidum vebant.* Idemque (§. XX, l. c.) repetit his verbis: *Nervi, quum ex canalibus cavis non constent, & quo perfunduntur, tenuissimum sit, in paralysi & atonia nervos non tam obstrui, sed potius ab humore subsistente comprimi, tonogz ac debita tensione privari, recte colligitur.* Quae si ita se habeant, quid quaeso restitat aliud, quam ut ingenue TANDEM confiteantur spirituum adsertores, eorundem existentiam aequa parum a posteriori ac a priori demonstrari posse. Ut nihil profecto consultius fuerit, quam obsoletam fabulam in Arcadiam fuisse relegatam, ne Medicorum circulos turbare amplius possit.

§. XLVI.

Sed, quod mirere, male id habet BURGGRAVIIUM, quod ad BIDLOUM provocaverim, cum ipse tamen ad Leeuwenhoeckium provocare aequum duxerit: Sed comparatione inter utrumque instituta, facile adparebit, utri eorum major fides hac in controversia sit habenda. BIDLOUS, ut neminem latere potest, fuit Anatomicus celeber, qui cum aliis artis suae peritis sua tempestate de palma contendere non erubesceret, & de cuius peritia opus ejusdem Anatomicum, in publicum emissum, haud fucatum praebet testimonium: *Leeuwenhoeckius vero, uti artis medicae;* Ita potissimum rei Anatomicae imperitus fuit. Deinde quaestio non est, an *Bidlous* prae *Leeuwenhoeckio* vel *bic* prae *illo* in parandis microscopiis majorem sibi famam paraverit? Aliud enim est, instrumenta, certo usui servientia parare, aliud, eadem in usum vocare: Ubi neminem, recta ratione utentem, spero, negaturum, *Bidlolio* prae *Leeuwenhoeckio* aliquam praerogativam esse concedendam; Quia, teste experientia, multi Mechanici parant instrumenta Chirurgica, Anatomica, Geometrica & Astronomica, quae tamen suos speciales in usus convertere

tere nesciunt. Liceat aliud ejus rei exemplum subministrare: *Müschens broeckius*, Pater, Mechanicus Leydensis celeber, magnam sibi famam comparavit in elaboranda antlia pneumatica aliisque ad Philosophiam experimentalem spectantibus machinis & instrumentis, litterarum caeteroquin rudis: Ejus filius, qui haec tenus summa cum laude *Physices & Matheſeas* professe in *Academia Duisburgensi* perfunctus, nunc vero in *Trajectinam* evocatus, a puerō litteris innutritus est. Quod si duo litigantes ad utrumque, si dubia oriretur quaestio, provocarent, alter ad *Patrem*, alter vero ad *filium*; Cuinam horum major fides esset habenda? Crederem ego; *Filio* potius quam *Patri*. Quia pro illo ceu litteris a teneris innutrito major militat praesumtio.

§. XLVII.

Quod observationes, ex scriptis *Leeuwenhoeckianis* haustas attinet, de illis usque adeo dubitanter loquitur *Commentator*, ut ipsemet parum illis fidei tribuere videatur. Liberaliter is largitur, tubulos nerveos simplices NUNQUAM vidisse *Leeuwenhoeckium*; Eundem sibi persuasissime, se non solum hiatus nervulorum transversim dissectorum, sed & singulos nervos, quantum in longitudine exporrigerentur, cavatos sive cavitate quadam pervios animadvertisse; *Blanditum* sibi fuisse eundem, autumasse, sibi visum esse, in nervo, cujus diameter tribus circiter menti virilis pilis respondebat, mille se vascula detexisse & cavitates illorum distincte agnovisse &c. Quibus inter se collatis, quid inde tandem infert BURGGRAVIUS? Id, quod Lector curiosus forte non sperasset; Nimirum *Leeuwenhoeckium* simplicissimorum tubulorum nerveorum cavitates NEUTIQUAM vidisse, neque etiam illas videri UNQUAM. Atque ita reum habemus confitentem. Quaerit tamen adhuc *Confutator noster*: Quid ergo vidit *Leeuwenhoeckius*? Aliquid ipsum vidisse, certum est; Sed quaestio est: An tubulos nerveos, secundum longitudinem nervi decurrentes & continuos, per quos transmissi sint spiritus, & quos in gratiam ejus nervosos dicimus, videbit? Altum silentium! Econtra *interstitia* saltem, fasciculos tenuiores tubulorum nerveorum intercedentia vidisse arbitratur. Judicet jam aequus harum rerum arbiter, qua fronte imputare potuerit BIDLOO, quod variis suis tentaminibus curiositati simul atque anxiō desiderio suorum Spectatorum, si assensum praebuerint, non tantum non satisferit, sed glaucoma potius illorum oculis offuderit. Ingens injuria, qua praeter meritum adficitur BIDLOUS, quamque, si viveret, severissime

rissime procul dubio esset vindicaturus, vel potius, quia cum Juvene medico res ipsi foret, generoso silentio contemturus. Mortuo Leoni insultare facile est. Quos ego spirituum animalium defensores citavi & confutavi, omnes in vivis sunt. Respondeat quisque pro se; Servos vero conductitios, qui aliorum passionibus famulantur, jam olim, alia occasione, depexos dedi.

§. XLVIII.

Quod vero, ut ex haec tenus dictis patet, ANATOMICE demonstrare non potuit BURGGRAVIUS; Id haud dubie rationibus evincere frustra adlaborabit? Imo vero: Adoptat interim, ut *canaliculosam nervorum structuram* adstruat, hypothesin nonnullorum Anglorum, dudum ab aliis confutatam, qui nutritionem ope nervorum fieri credebant, per quos quippe si succus advehiri ad partes nutriendas deberet, tubulosa eorundem structura necessaria foret; Unde sequeretur; Nervos C. H. simplicissimos tubulos esse. Sed, quamvis vasa nonnulla majora (non tamen promiscue omnia) quae a centro ad circumferentiam vehunt liquores, continuo in minora atque minora resolvantur, falsissimum tamen est, quod *ultimo ex fibris nerveis componantur*; Sed arteria, licet ad extremitatem partium perveniens, capillaris evadat, manet tamen arteria; Idemque de venis, vasis lacteis & lymphaticis verissimum est. Monstrum ergo in Anatomicis alit, qui arterias, venas, ductus lymphaticos & lacteos in nervos, & hos in illos converti, sibi imaginatur.

§. XLIX.

Ventriculum denique subvertunt formulae, quibus more aliorum speculatorum Mechanicorum utitur Noster: Tubulos scil. nerveos, dum simplicissimi sunt, hos per medium QUASI scissos & in membranulas QUASI explicatos, CONCIPERE NOBIS LICET. Itane vero conceptus noster imponit rebus in corpore humano textis & struetis necessitatem ita existendi, quemadmodum a nobis concipiuntur? Ideone ejusmodi membranula, quam mente saltem nobis repraesentare, oculis vero cernere vel manibus palpare non possumus, in superficie sua lineas concipere permittet? Ideone, quia speculator aliquis, non consulta prius harum rerum natura, animo suo concipit, verum erit, fibram C. H. simplicissimam, quarum plurium adunatione membranulam simplicissimam fieri creditur, in semetipsam convolutam. QUASI gignere vasculum simplicissimum, quod NERVUM SIMPLICEM dicimus?

Apago naenias, quibus tempus inutiliter perditur, toti vero negotio,
quod probandum erat, nihil consulitur.

§. L.

Possem hic omni jure subsistere, & quae de *effectibus* pariter atque *affectionibus spirituum* ex hypothesi proferuntur, suo loco relinquere; Cum enim in totius negotii cardine, ubi QUAM MAXIME dissentire a me laborabat, scilicet in evincenda tubulosa nervorum strutura, ac demonstranda reali *spirituum* existentia tam jejune & oscitanter sese gesserit *Commentator*; Vix sperandum, melioris farinae fore, quae de natura & essentia eorundemque effectibus in corpore humano vivo tam sano quam aegrotante adferentur. *Non entis enim nullas esse affectiones*, inter omnes constat. Ut tamen luce meridiana adpareat clarius, aequa jejuna ac sterilia esse, quae de eorundem indole differuit *spiritum* defensor, peto, ut in toto *scripto Burggraviano* vel unicus mihi locus ostendatur, in quo justam *spiritum*, quorum defensionem in se suscepit, *definitionem*, legibus Logices satisfacientem, vel saltem qualemcumque *descriptionem* subministraverit?

§. LI.

Nominalem equidem (Sect. I. Membro II. Art. VIII.) circa finem reperio, hujus propemodum indolis: *Quod spiritus animalis sit spiritus, qui per nervos fluendo munia sua exequatur, nervosus ideo dicendus.* Id quod revera nihil aliud est, quam circulum committere, quia idem est in responsione, quod erat in quaestione; Proindeque possem, si vellem, majori jure *Burggravio* applicare, quod ipse *Goblio* ex comico Gallico objecit. *Quaeritur enim, quid sint spiritus animales?* Respondet ille; *Quod sint spiritus per nervos fluentes.* Si iterum quaeratur, quidnam sit, quod per nervos defluit? Respondet iterum; *Esse spiritus.* Eodem modo, ut *Candidatus Medicinae apud Mollierium.* *Cur opium facit dormire?* Quia habet vim dormitivam.

§. LII.

Verum nolo hac vice cum adversario meo tam rigide agere; Accingo me potius ad examen definitionis seu descriptionis realis, quae eadem sectione (Art. VII.) occurrit his verbis: *Spiritus nervosi nihil aliud sunt, quam aqua subtilissima cum pinguedine mitissima blandissimaque intime commixta, & in minimis, omnem imagi-*

imaginationem excedentibus suis particulis discepta, binc summe mobilis, perfecte volatilis, in minimis partibus solidissima, omnis elasticitatis expertis. Quot verba, tot difficultates, haud facile superabiles. Dicuntur hi spiritus *aqua simplicissima*; Itaque secundum Auctorem nostrum spiritus nervosi indolis aquosae sunt; Id quod quempiam alium adseruisse, non recordor. Anne vero per aquam illam idem intelligit lympham vel serum? Uterque enim liquor, ad ignem quoq; fugax est. Magis tamen *hoc p[ro]ae illa*. At vero lympha nutritioni seruit, serum pure excrementitium est, & nihilominus spiritus supposititii functionibus animalibus, sensibus & motibus excitandis famulantur. Non comprehendo, quomodo haec inter se mutuo cohaereant. Sit interim ista subtilissima imo subtilitate superet lympham cerebri, propterea tamen indoles ejus nihil mutabitur. Destilletur aqua vel centies, manebit tamen aqua officio, cui destinatur, inepta. Dicitur praeterea, hanc aquam subtilissimam *cum pinguedine minutissima blandissimam, intime COMMIXTAM*, sed tamen simul in minimis suis particulis DISCERPTAM esse; Manifesta contradictio; Quod enim intime commixtum, id simul eodemq; tempore in minimis suis disceptum dici nequit. Deinde constat, aquae cum oleo male constare. Concussa inter se aquosa cum oleosis, superficialiter quidem commiscentur, nunquam intime coëunt. Quando porro hunc spiritum summe mobilem & perfecte volatilem dicit ejusdem defensor, videat, quomodo haec attributa cum ejus aquositate conciliet. Potissimum vero aures ferit, quando iidem spiritus in minimis suis partibus *solidissimi* dicuntur: Quia soliditas non praedicitur de fluidis, sed de duris, rigidis ac resistentibus corporibus, cum aqua sit corpus fluidum, molle, aguillarum instar mobile, aliorumq; corporum impulsui cedens, proindeq; omni soliditate destitutum. Denique elasticitatis expertes iidem creduntur spiritus; Id quod tamen attributum in illis maxime necessarium esse, putant alii. Taceo, experimentis, mediante antlia pneumatica adornandis sufficienter patere, aquam sua non minus, quam alia corpora, elasticitate gaudere. Cur igitur spiritibus, qui secundum Defensoris sententiam nihil aliud sunt, quam aqua simplicissima, elasticitas denegatur?

§. LIII.

Haec vero, dum in descriptione spirituum *Burggraviana*, quam cum *Boerhaaveniana* communem habet, desidero, num quaeso insimulari jure possum, quod Celeberrimum *Boerhaavium* lacesiverim, qui quippe

quippe de ejusdem Institutionibus ea modestia sensi, ut illis debitum suum honorem lubens reliquerim, quanquam, quomodo singulara definitionis spirituum verba inter se mutuo cohaereant, comprehendere nequeam, licet tam ad antecedentia quam consequentia omni, qua decet, attentione respiciam.

§. LIV.

Venio nunc ad organon modumq; secretionis spirituum, quam methodo simplicissima, planissima, attamen verissima fese traditum, *Commentator Noster* (Art. VI. Sect. I. Membro II.) liberaliter pollicetur. Repetit eum in finem ex Physiologicis majore, quam opus erat, prolixitate in dolem sanguinis humani, ejusdem circulationem & effectus, in sanguinem ipsum inde resultantes, quorsum, cum etiam secretionem spirituum nervorum in specie referat, arrigendae nunc sunt aures, ut, quod tanto hiatu dignum, sit prolatus.

§. LV.

De organo secretionis altum hic est silentium, nisi ad glandulosam corticis cerebri substantiam hic iterum confugiat *Commentator*; Quam tamen imaginariam esse nihilque cum aliorum viscerum glandulosorum textura commune habere, jam superius ex Ruy-schyo, Heistero aliisq; Recentioribus Anatomicis ostensum est. Modum secretionis quod attinet, illum, invitis licet & reclamantibus circulationis humorum legibus, imo invitis quoque observationibus praetico-clinicis, sic praefigurat: Sangvine scilicet ad aortam delato, & ramos ejus superiores ingredi conante, ob flexionem seu curvaturam ejus resilire, sicque graviores sanguinis partes arterias subclavias magis praeterlabi, & specie leviorem tam has quam etiam carotidem sinistram ingredi; Cumq; porro arteriae subclaviae praeter dextram carotidem & duas vertebrales largiantur, quathor vero hae arteriae perpendiculari fere itinere caput petant: Hinc ulterius infert: Sanginem interiora subclaviarum latera alluentem, multo tenuiorem, defaecatiorem sui portionem trium harum arteriarum osculis superne intrudere. Imo sangvine tandem ad locum divisionis in Carotides internas & externas perveniente, caputq; jamjam petituro, gravantem sarcinam in carotides externas demitti, priore iterum parte alacriter sursum ascidente. Denique, ne quid impuri ac faeculenti palatum mentis ingrediatur, glandulae pituitariae partes nondum satis defaecatas committi sibi imaginatur: Sicque sanguinem omnem in piam Matrem adiectum esse levissimum, purissimum fluidisse-

fluidissimumq; totius corporis, lympha crystallina summae fluiditatis ditissimum, qui deinde, ceu *albumen ovi incubatione attenuatum*, succosas & musci speciem referentes harum arteriolarum extremitates intret, & primum ad corticem, deinde vero ad medullam cerebri defaecatisfimam subtilissimamq; lympham SPIRITUUM nomine dimitat.

§. LVI.

Verum universam hanc praefigurationem & exquisitam quasi puri ab impuro, subtilis à crasso separationem, esse mere chymaericam, monstrat primum uniformis & aequalis sanguinis tam per truncum aörtae descendenter, quam adscendentem distributio, mediante motu cordis systaltico producta, ubi nullam solidam, imo ne probabilem quidem caussam indagare licet, quae variis istis in locis sanguinem puriorem & leviorem ab impuriore & graviore summa quasi prudentia separat, cum istius quoque secretionis nulla sit necessitas. Praeterea refragatur eidem experientia, cum, qui per haemorrhagias narium spontaneas excernitur sanguis, ejusdem plane indolis ejusdemq; craseos sit, ac ille, qui sectione in pedibus insti-tuta extrahitur, immo cum eo, qui haemoptysi sponte rejicitur, ratione subtilitatis ac floridi status ne quidem in comparationem venire potest. Imo reclamat observationes practico-clinicae & inspectiones cadaverum, apoplexia, in primis sanguinea, denatorum, eorum quoque, qui diuturnis cephalalgiis laborarunt, in quibus quippe vasa meningum sanguine crasso, faeculento ac nigricante turgida & varicosa fuere deprehensa; Qualium observationum ingens numerus apud Bonetum in sepulchreto, Wepferum aliquo legi potest.

§. LVII.

De receptaculo seu diversorio, & quidem ita commode locato, ut tubulos nervorum undiquaque respiciat, spiritusque eosdem pro circumstantiarum ratione & exigentia promte subingredi valent muniaque sive ab anima rationali ipsis injuncta sive spontaneo & automatico motu suscepta exequi digne queant, altissimum iterum in scripto Burggraviano silentium est. Quo vero interea jure exultans & quasi ovans (Art. VII. Sect. I. Membr. II.) exclamare poscit: *Existunt igitur Spiritus Nervosi!* Id perito atque circumspecto Lectori perpendendum ac dijudicandum relinquo.

§. LVIII.

De motu itidem spirituum animalium, si quam maxime existere tales,
conce-

concedere vellem, non leves quoque in scripto meo de spiritu animali è foro medico proscripto, moveram difficultates. Nec inuste quaesiveram: Ubinam maneant, postquam demandata sibi provincia fuerint perfuncti? Imo haud inanis suborta fuit difficultas, undenam tanta spirituum quantitas semper suppetat, ut totidem in Oeconomia animali functionibus, rationalibus, animalibus, vitalibus & naturalibus prompte semper peragendis sufficient? Verum cunctis hisce dubiis pro ea, qua pollet, ingenii in fingendo felicitate, medicinam paravit *Burggravius*. Quantitatem spirituum nervosorum ex quantitate sanguinis, per quatuor capacissimas arterias cerebrum subingredientis, aestimat; Ubi tamen manifestam iterum principii petitionem committit: Illud enim probandum incumbebat Clar. Auctori, sanguinem ideo tanta in copia capitis interiora petere, ut spiritibus tanta in copia ibi secernendis inservire posset.

§. XLIX.

Motum eorundem sic delineat: Sangvinem scil. ex hypothesi defaecatissimum, in cerebri corticem, quem hic, missa priori sententia de textura ejus glandulosa, cum Ruyschii totum vasculosum esse agnoscit, propulsum ulterius, prius tamen subtilissima, purissima levissimaque lympha suo ex sinu dimissa, in tubulos medullares transmitti: Cumq; posterior priorem spiritum urgeat, ex his ulterius in copiosissimos nervos, ubique per corpus varie inflexos impelli, idq; motu admodum tranquillo. Verum cuncta haec adserta meris iterum principii petitionibus nituntur. Nego, interiora cerebri alias indolis sanguinem petere, quam qui per reliquas omnes inferiores corporis humani partes distribuitur; Nego, substantiam Cerebri tubulosam esse; Nego denique, ex Cerebro ullum prodire nervum. Unde pronissime sequitur, fictitia esse omnia, quae de motu & distributione spirituum animalium hic adlata fuere.

§. LX.

Ubi vero manent decantati illi spiritus, si vel maxime liberalibus nobis esse placeret atque concedere, modo ab Auctore praefigurato illos undiq; in corpore & per corpus universum distribui? An forte fuga sibi consulunt, & per habitum cutis porosum atque perspirabilem, more aliorum humorum serosorum, salinorum & sulphureorum exhalant? Respondet is: Continuam esse horum spirituum secretionem, & credibile admodum esse, illos eodem, quo prius, ritu circulum suum saepius absolvere, dum partim in tenuissima vascula lymphatica,

tam in ipsis nervis, quam alibi ubique per totum corpus occurrentia infundantur, unde in vasa lymphatica specie majora, mox in corrivantes rivulos lymphaticos communes tandem in sanguinem & cor deferantur; Nec minus credibile esse, quod humoribus in glandulis ac passim etiam ipsi sanguini iterum admisceantur. Quae omnia, ut, sic sese habere, firmiter quis sibi persuadeat, forti non modo imaginativa sed & fide propemodum miraculosa opus est. Si enim crassum sal, si crassum sulphur, fero permixtum, ut sensus feriat, exhalando per habitum corporis porosum emigrare potest, quidni spiritus, quos sub lymphae subtilissimae, purissimae levissimaeque schemate adumbrare hodie solent, tanto certius celeriusque, per eandem viam exitum tentaret?

§. LXI.

Ex quibus omnibus cordatus Lector plenissime simulque planissime atque facillime nunc perspiciet, ne illum unicum eorum dubiorum, quae contra existentiam, essentiam, indolem, motum & effectus spirituum animalium tam in corpore sano & integro quam variis morbis labefactato mota à me fuerant, legitime solutum esse. Quamobrem neminem quoque vitio mihi versurum existimo, si, quae Adversarius (Sect. II.) de effectibus spirituum nervosorum in corpore humano vivo tam sano quam aegroto (ex hypothesi) differuit, siccо pede transeam. Demonstravi ego passim dissertatione secunda, quae *Physiologica* est, quod universum tam sensum quam motum negotium in corpore humano sano & integro sine subsidio spirituum animalium eleganter & concatenata serie explicari queat; Demonstravi quoque *Dissertatione tercia*, quae *Pathologica* est, nullum existere morbum, qui vel ab aucto vel ab imminuto spirituum nervosorum motu, tanto vero minus a vitiosa eorundem crassi dependeat: Omnes potius longe alias agnoscere caussas, praxi clinicae magis conformes, clarissime ostensum est. Haec à me jacta fundamenta subruenda ac radicitus extirpanda fuissent, si, quod operae valeret pretium, praestitisse, vel spirituum in exilium legatorum revocationem cordi sibi fuisse, videri voluisset; Jam vero revera nihil praestitit aliud, quam quod frigidum & ruinae proximum sistema spirituum quomodocunque suffulcire novisque pigmentis exornare cordi habuerit.

§. LXII.

Nihil itaque restare videtur aliud, quam ut ea adhuc vindicem, quae passim tota sectione secunda, mihi objecta sunt; Quae tamen eo facilius à me dilui, & cum reliquis meis adassertionibus conciliari poterunt

poterunt, quo luculentius est, pleraq; extra demonstrationum connexionem decerpta Lectori exhibita fuisse, quae si legitimus sui nexus eidem offerantur, longe aliam statim faciem acquirent. Miror autem, Clarissimum Burggravium primo statim articulo, ubi usum spirituum nervorum pro tensione partium naturali praestanda declarare contendit, adoptare doctrinam Excell. Stahlii de motu partium tonico, quam si meditando successu temporis familiariorum sibi reddiderit, facile intelliget, ad explicandam rationem tensionis partium naturalis aequa parum influxu spirituum nervorum opus esse, quam ad declarandam formalem sensuum pariter atq; motuum rationem. Quare spem non plane vanam concipio, fore, ut tandem Burggravius, qui & ingenio & judicio sufficienti pollet ad has res fundamentaliter perspiciendum, tandem convertatur, fabulosam de spiritibus nervosis doctrinam mittat, suamque praxin Medicam, quam ut in civitate patria cum aplausu exerceat, locupletem quotidie occasionem inveniet, aliis longeq; solidioribus fundamentis superstruat. Quod, ut propediem fiat, est, quod animitus opto.

§. LXIII.

Conqueritur (Articulo III.) ubi usum spirituum nervorum pro motibus corporis voluntariis & ex voluntario & automatico mixtis tradere contendit, conqueritur, inquam, se capere non posse, quid intelligam, quando sic scribo; *Quod si in singulis securis elevationibus ac depressionibus aliquot spirituum manipuli in brachiorum musculos pro nervos fluant, jure utique metuendam, ne tandem, eorum penu exhausio, brachia concidant.* Quae verba contra genuinum atque naturalem eorundem sensum sic interpretatur, quasi crederem ego, operarios, qui in lignis findendis toto die occupati sunt, laboribus fessos non redi, solis fabris ferrariis exceptis. Egregia vero ironia, authore suo non indigna! Si solidi quippiam habuisset, quod objiceret Burggravius, à puerili lusu facile abstinuisset. Genuinus scil. qui ex mutua comparatione §. IX. dissert. I. & §. XXX. Diss. II. facile dilucescit, verborum sensus hic est: Verum esse non posse, tantam spirituum animalium copiam in cerebro, cerebello atque medulla spinali semper praesto esse posse; *Quia, si operarius vel faber ferrarius, à primo diluculo in seram usque noctem operi suo intentus, singulis brachiorum elevationibus ac depressionibus aliquot spirituum manipulos per nervos in musculos amandare debeat, metus est, ne penu eorundem exhausio brachia & cum illis vires quoque concidant.* At vero, tenui victu

quo ejusmodi homines ut plurimum utuntur, nihil obstante, non solum ex tanto spirituum dispendio universalem virium lapsum non patiuntur, sed & postquam LABORE FESSI placide obdormivere, postero & sequentibus diebus eadem alacritate opus suum prosequuntur, manifesto argumento & documento, quod nec tenuis vietus nec paucarum horarum somnus tot spirituum, diurno labore amissorum legiones reparaverit, sed quod miranda illa virium restitutio longe alii caussae, nimirum fibrarum muscularium tono atque elateri, qui quippe repetito actu admirandam vim atque energiam motoriam adquirit, vindicanda & adscribenda sit. Sed fortassis Francofurti ad Moenum bajuli, lignorum fissores & fabri ferrarii vel quicunq; alii operarii vinum Rhenanum bibunt, quem pre nostro majori spirituum copia foetum atq; imbutum esse, nemo ignorat. Sed pudet imo taedet ineptiarum; Quare ad alia magis feria transeo.

§. LXIV.

Iterum vero *Burggravius*, usum spirituum animalium pro somno atque vigiliis declaraturus me impedit imputatque, quod FRUSTRA quaeram: Unde tam systalticus quam diastalticus cordis arteriarumque motus oriatur, si durante somno parcius fit spirituum influxus, vel si, ut *Rivinus* putavit, in somno etiam maxime diurno spiritus influere desinat. Non frustra sic quaero: Si enim dormiente homine, dormiant quoque spiritus, vel saltet, ut cautius loquuntur alii, parcius influant, aut fateantur, spirituum horum motum & actionem tempore somni nullam esse, aut allegandum erit aliud principium, à quo motus cordis arteriarumq; systalticus & diastalticus, concoctio alimentorum in ventriculo, succi alibilis per vasa lactea distributio, excrementorum variorum se- & excretio aliaeque functiones vitales & naturales procedant. Sed ita cum systemate spirituum comparatum est; Fingas, refingas, demas, addas, vel, quicquid lubet, facias, nullibi tamen inter principium & conclusiones justum nexum deprehendes.

§. LXV.

Cum itaque in parte doctrinae hujus *Physiologica* nihil reperiret, quod in me opprobraret, imbelli adhuc dubium ex *Pathologia* de- prompsit. Quaerit iterum: Quo demum experimento probatus sim, tam validum spasmum, qualis in catalepsi adest, à pia matre oriri posse? Quamvis autem unus, ut proverbio dicitur, plus quaerere possit, quam decem respondere: Hic tamen quaeſito quam facillime satisfieri potest,

potest, imo allegata thesi XV. Dissert. III. jam plenissime satisfactum est, adductis nimirum historice talibus morbi circumstantiis, ex quibus pronissime fluit, phaenomena illa Catalepticorum nulli alii caussae, quam vehementi spasmo durae meningis esse imputanda. Quod si haec allegata caussa *Burggratio* displiceat, aliam historiae morbi convenientiorem ut adferat, integrum ipsi fuerit.

§. LXVI.

Denique male habet nostrum, quod carpserim Celeberrimum *Hoffmannum*, qui catalepsin morborum soporosorum classi adnumeravit, ego vero affectum tota sua indole spasmodicum esse censui. Si credit *Censor*, in catoche cessationem sensus atq; motus aedesse, fallitur veramque ejus naturam ignorat. Ex disputationis III. §. XII. & XIV. quibus brevem atque succinctam Catalepsis historiam tradidi, melius informari poterat. Qui videt objecta extra se posita, audit, quae ab adstantibus proferuntur, eaque, affectu superato, aliis enarrat, qui protrusus ad aliquot passus progreditur, qui, quod ori ingestum est, deglutire potest; Qui erectus consistere valet, & in quo respiratio, pulsus aliquique actus vitales salvi & integri manent, eum sensu & motu destitutum atque adeo morbo soporofo adfectum esse, nemo forte dixerit. Quod vero ex Praefatione ad Historiae Medicinae Universalis Periodum quintam elicere velit *Burggravius*, parum me *Hoffmanno* favere, id partim praematurum est judicium, partim ad ipsum nihil spectat. Ut vero, quae ad apologiam istam scribendam impulerint rationes, in sinum ejus effundam, nulla efflagitare videtur necessitas.

§. LXVII.

Sic ergo, vindicatis, quae *Commentatori* displicebant, plerisque adassertionibus meis, pari nunc libertate αλλοτριωσιν miram, quae tantum non omnibus in paginis Sectionis secundae se se fistit, perstringere possem: At vero, quia permulta, quae in scripto meo, quo spiritum animalem ex foro medico relegatum fisto, jam continentur, inutiliter repetenda forent: Malo hic subsistere peritoque Lectori judicium relinquere.

§. LXVIII.

Duo tamen, priusquam calatum abjiciam, adhuc monenda esse duxi: Primum est; quod Clar. *Burggravius* vituperandum Divini nominis abusum committat, quando circa finem Sectionis secundae scribit: *DEUM sapientissime prospexit, ne spiritus animales*
vel

Vel lentore vel acrimonia adeo facile inquinentur. Providentia divina non versatur circa res nihili, chymeras & non entia, sed circa res realiter existentes; Ad quas cum non pertineant spiritus animales, imo potius inter chymeras & non entia haud postremum occupent locum, frustra sine dubio adseritur, DEUM sapientissime prospexit, ne spiritus animales lentore vel acrimonia adeo facile coinquinentur: Non entium enim nullas esse affectiones, Scholarum Magistri discipulis suis dudum inculcarunt.

§. LXIX.

Deinde, aliquis adhuc scrupulus Clariss. BURGGRAVIO eximendus est, qui exinde ipsius in animo natus esse videtur, quod adseruerim, mechanicis rationibus uti, idem esse, ac artem omnium nobilissimam ad bilisimas & illiberales, quae proprie mechanicae (opificia) adpellentur, rejicere. Non est vero, quod metuat, ex hac adseritione quicquam periculi Mechanismo fano, quem eum permultis aliis ejusdem propugnatoribus arti Medicæ pro fundamento substernit, imminere; Ipsem etenim in Institutionibus Medicis secundum PRINCIPIA MECHANICO-ORGANICA reformatis haud ita pridem verum demonstrandi principium in arte salutari MECHANICO-ORGANICUM stabilivi, & quid de rationali Mechanismo sentiam, satis superque exposui, Digitum tantum intendo in eos, qui Mechanicis hisce principiis turpiter abutuntur, & ubique Mechanismos fingunt, ubi nulli sunt, introducendo in theoriam medicam integras particularum, hoc vel illo modo figuratarum, his aut istis magnitudinibus &c. praeditarum myriades, ex quibus phaenomena occurrentia explicari posse opinantur. Fecerunt haud pauci ejus rei periculum, in morbis v. g. aetatum, periodicis, haereditariis aliisque, ex hisce principiis illustrandis; Verum cum aqua haeret ubique, nec debitus inter conclusiones & principia ista nexus conspiciendum fese daret; Econtra vero non pauci illorum nimia sua fingendi licentia prudentioribus risum moverent: Nemo, opinor, fuerit, qui pejorem in partem accipiet, quod evagantes tales speculationes Mechanicorum posterioris classis ineptias vocaverim. Si specimina quaedam talium *affaniarum* legere gestiat Clar. BURGGRAVIUS, evolvere poterit tractatulum de MECHANICIS NON MECHANICIS, qui ante aliquot annos lucem adspexit publicam, nec non specimen alterum INSTITUTIONUM MEARUM, secundum principia MECHANICO-ORGANICA reformatarum; Et mirabitur, Viros sapientes eo maxime tempore, quo seriis maxime intenti esse debebant, crepundiis talibus, puerorum more, magnam vitae suae partem inutiliter consumpsisse.

§. LXX.

Pedem hic figo, & stricturas meas in COMMENTATIONEM BURGGRAVIANAM sic obsigno: Quod nempe, cum BURGGRAVINIS nervum totius controversiae ne extremis quidem digitorum apicibus tetigerit, nec ullum solidius, quam ab aliis dudum factum fuerat, argumentum attulerit, quod pro spirituum nerborum existentia militaret, reliqua etiam, quae de *indole*, *motu*, *effectibus* & *affectionibus* eorundem in *corpo humano* siro tam *sano* quam *aegro* differuit, hypothesis tantum redoleant, atque adeo nihil operoso suo conatu egerit aliud, quam quod cramben centies coctam recoxerit; Pronissime inde consequatur: SPIRITUS ANIMALES EX FORO MEDICO JUSTE RELEGATOS ESSE. Quae omnia si in forma a me probata videre cupiat, sequetur suo tempore universus Processus Criminalis, SPIRITIBUS ANIMALIBUS intentatus, ne quid habeat, quod vel in *materia* vel in *forma* ejusdem jure desiderare queat,